






徐氏筆精卷之三



晉安徐

焞興公謨輯

同里邵捷春肇復訂定

溫陵黃居中明立編次

詩評

一魏

唐凡三十七則

劉徐贈會

劉楨贈徐幹云思子沈心曲長嘆不能言起坐  
失次第一日三四遷幹荅云與子別無幾所經  
未一句我思一何篤其愁如三春雖路在咫尺



難涉如九閻皆情至之語顏謝以降華藻勝而情語稍漓矣

### 覓句

古今詩人摹寫覓句景象有極工者如吟安五箇字捫斷數莖鬚如險覓天應悶狂搜海亦枯如竟日覓不得有時還自來如句向夜深得心從天外歸如是事精皆易惟詩會却難如窮理多瞑目含毫靜倚松如終篇渾不寐危坐到晨鐘如兩句三年得一吟雙淚流如夜吟曉不休苦吟神鬼愁如生應無輟日死是不吟時如五七字中苦百千年後清如宿客嫌吟苦乖童恨睡遲宋林逋云只緣吟有味不覺坐勞神此非深於詩者不能道也

### 天子氣象

唐太宗秋露凝高掌朝光上翠微勞歌大風曲威加四海清便有天子氣象

### 唐詩溫厚

豈不惜賢達其如高尚心唐玄宗不逆其臣得



罪風霜苦全生天地仁劉長卿不怨其君家貧  
僮僕慢官罷友朋踈耿漳不罪其友見詩人溫  
厚之意

### 磨笄戴斗

唐張易之出塞曲云轉戰磨笄地橫行戴斗鄉  
磨笄見戰國策戴斗見爾雅又云將軍占太白  
小婦怨流黃腰裊青絲騎娉婷紅粉粧一春鶯  
度曲八月鴈成行皆佳句也是故君子不以人

廢言

### 乾坤

杜少陵喜用乾坤字曰乾坤萬里眼乾坤一草  
亭乾坤一腐儒無力正乾坤納納乾坤大乾坤  
水上萍乾坤一戰收乾坤繞漢宮開闢乾坤正  
皆鄙俗可厭惟乾坤日夜浮一句頗佳

### 岳陽樓詩

杜甫岳陽樓詩大都與浩然伯仲杜起首句昔  
聞洞庭水今上岳陽樓孟云八月湖水平涵虛  
混太清杜首聯吳楚東南坼乾坤日夜浮孟云



氣蒸雲夢澤波撼岳陽城皆渾雄警策至于杜  
次聯親朋無一字孟云端居耻聖明覺無謂而  
結句各不稱矣

霜雨雪雲

唐張謂餞田尚書還兗州云別路逢霜雨行營  
對雪雲霜雨雪雲原非連綿之字張合用之亦  
新不似盛唐人句

塞上四時

張敬忠五原春色舊來遲二月垂楊未掛絲卽  
今河畔冰開日正是長安花落時蓋言春之氣  
候異也盧弼盧龍塞外草初肥燕乳平蕪曉不  
飛鄉國近來音信斷至今猶自着寒衣蓋言夏  
之氣候異也王縉莫將邊地比京都八月秋風  
草已枯今日登高尊酒裏不知能有菊花無蓋  
言秋之氣候異也李頻關門南北雜戎夷草木  
秋來卽出師落日風沙長暝早窮冬雨雪轉春  
遲蓋言冬之氣候異也四詩模寫邊塞光景極  
肖



任華長篇

盛唐任華寄李白寄杜甫懷素草書歌三長篇  
信口狂叫不遵紀律亦是恠體盧仝飲茶月食  
詩效之耳

贈鄰

錢起贈鄰居齊六詩云雞聲共林巷燭影隔茅  
茨于鵠題鄰居云蒸黎常共竈澆蕪亦同渠傳  
履朝尋藥分燈夜讀書高季迪贈隣友云林近  
書燈露溪迴酒舫通放鳧長合隊移竹每分叢  
傅木虛贈隣人馬水甫云樓迴常分月墻低不  
隔花陳軒伯贈隣友云夜泉皆屋後曉塔共窓  
中趙仁甫題隣舍云戶外分垂柳墻頭過落花  
又徐鎧喜李少保卜鄰云井泉分地脉砧杵共  
秋聲梅堯臣贈鄰居云籬根分井口壁隙透燈  
光皆能摹寫真切者也予與鄰友吳元化交最  
密戲贈十韻云草舍相隣並幽居隔短垣山光  
齊到屋樹蔭兩遮園碧露篝燈影香聞壓酒尊  
花分粘戶片苔長過籬痕碩鼠均偷果驕厖互



守門秭蔬先得種蒔竹易移根蛛網牽簷簷近雞  
羣鬪柵繁不窺家室好時聽笑聲喧賽社輪僮  
僕搏沙狎子孫杜華與王翰朝夕往來煩

言詩

今之爲官者皆諱言詩蓋言詩往往不利于官也  
不惟今時爲然卽唐以詩取士詩高者官多不  
達錢起有云微官是何物許可廢言詩其意遠  
矣

日斜人去

賈誼鵬鳥賦云四月孟夏庚子日斜野鳥入室  
主人將去劉長卿過賈誼宅首聯云秋草獨尋  
人去後寒林空見日斜時用其語畧無痕迹

劉方平銅雀臺詩

劉方平銅雀臺詩云遺令奉君王顰蛾強一妝  
歲移陵樹色恩在舞衣香玉座生秋氣銅臺下  
夕陽淚痕沾井榦舞袖爲誰長此詩較昔年分  
鼎地之作可相伯仲

殺風景



松間喝道甚殺風景嚴維遊雲門寺云深木鳴  
騶馭晴山耀武賁實不雅也蔡襄云欲望喬松  
却飛蓋爲聽山鳥歇鳴騶庶幾免俗

### 馬汗驚濤

李益云馬汗凍成霜孫魴云驚濤濺佛身人謂  
冬月豈有汗馬驚濤不入佛寺然奇妙處正在  
此以理論詩失之遠矣

### 印文硯匣

柳子厚柳州詩云印文生綠經旬合硯匣留塵  
盡日封印文生綠公事絕少硯匣留塵私事亦  
稀投荒情況不盡淒涼况十二年之久乎李杜  
韓柳輒遭放逐往往文生於情信夫富貴之言  
難工也

### 在官種樹

柳子厚貶柳州種木欂花詩云上苑年年占物  
華飄零今日在天涯祗因長作龍城守剩種庭  
前木欂花白樂天守忠州種荔支詩云紅顆玊  
珠誠可羨白鬚太守亦何癡十年結子知誰在



自向庭前種荔枝程師孟守福州種榕樹詩云  
三樓相望枕城隅臨去頻栽木萬株試問國人  
來往處不知還憶使君無柳詩近怨白詩近達  
程詩近誇

新竹

昌黎新竹詩云稀生巧補林併出疑爭地深得  
體物之妙

憤峯寺三絕

劉禹錫玄都先後二絕世人傳誦而不知任翻

憤峯寺三絕尤委婉可詠也初遊云絕頂清秋

生夜涼崔飈松露滴衣裳前峰月照半江水僧

在翠微開竹房再遊云靈江江上憤峯寺三十

年來兩度登老鶴尚存松露滴竹房不見舊時

僧三遊云清秋絕頂竹房開松鶴何年去不廻

惟有前峰明月在夜深猶過半江來

咏草

白樂天咏草云野火燒不盡春風吹又生已傳  
播今昔矣又唐僧云時平生戰地農惰入春田



又元楊基云六朝舊恨斜陽外南浦新愁細雨中風調情境俱不在樂天之下唐僧句見山谷集或云是蔡襄詩非也

### 池上篇

白樂天池上篇云十畝之宅五畝之園有水一池有竹千竿勿謂土狹勿謂地偏足以容膝足以息肩有堂有庭有橋有船有書有酒有歌有絃有叟在中白鬚飄然識分知足外無求焉如鳥擇木姑務巢安如龜居坎不知海寬靈鶴怪石紫菱白蓮皆我所好盡在吾前時飲一杯或吟一篇妻孥熙熙雞犬閒閒優哉游哉吾將終老乎其間此篇可當一首園記讀之灑然不獨仲長樂志論擅名千古矣

### 長吉儁語

長吉詩評者以爲牛鬼蛇神二百三十餘篇頗難解說然其佳處固不在于詭恠也如花臺欲暮春辭去落花起作迴風舞又半捲紅旗臨易水霜重鼓寒聲不起又王子吹笙鶯管長呼龍



畊烟種瑤草又空將漢月出宮門憶君清淚如  
鉛水又樓頭曲宴仙人語帳底吹笙香霧濃又  
終南日色低平灣神兮長在有無間又樓前流  
水江陵道鯉魚風起芙蓉老又况是青春日將  
暮桃花亂落如紅雨又一編香絲雲撒地玉釵  
落處無聲膩又春風爛熳惱嬌慵十八鬟多無  
氣力又天授秦封祚未終袞龍衣染荆卿血又  
有時半醉百花前背把金丸落飛鳥又春羅書  
字邀王母共宴紅樓最深處鶴羽衝風過海遲  
不如却使青龍去又鬢髮胡兒眼睛綠高樓夜  
靜吹橫竹一聲似向天上來月下美人望鄉哭  
如此工煉卽少陵太白未必能道也

下第咏燕

元和中章孝標下第賦燕詩上主司庾承宣云  
舊壘危巢泥已落今年故向社前歸連雲大厦  
無栖處更傍誰家門戶飛又歐陽澥下第亦賦  
燕詩上主司鄭愚云翩翩雙燕畫堂開送古迎  
新幾萬回長向春秋社前後爲誰歸去爲誰來



託諷微婉得風人之體

詩用之字

盧仝詩喜用之字青樓朱箔天之涯林花撩亂  
心之愁此心復在天之側相逢之處花茸茸皆  
不俗

切夢繫腸繫悶割愁

施肩吾云三更風作切夢刀萬轉愁成繫腸線  
蘇子瞻云繫悶豈無羅帶水割愁還有劍鋸山  
皆有苦思

陳陶步虛引

劍浦陳陶唐末隱西山步虛引云小隱山人十  
洲客莓苔爲衣雙耳白青編爲我忽降書暮雨  
虹蜺一千尺赤城門閉六丁直曉日已燒東海  
色朝天半夜聞玉雞星斗離離礙龍翼奇峭不  
減李賀

輕薄

溫飛卿聞車駕西遊因而有作云宣曲長楊瑞  
氣凝上林狐兔待秋鷹誰將詞賦陪雕輦寂寞



相如臥茂陵。輕薄之意溢于言外。

### 蘇武故事

溫飛卿蘇武廟詩。迴日樓臺非甲帳。去時冠劍是丁年。甲帳是武帝事。丁年用李陵書中語。極痛切有味。不獨對偶之工也。

### 梨岳廟

唐李頻四皓廟云。東西南北人。高跡自相親。天下已歸漢。山中猶避秦。龍樓曾作客。鶴氅不稱臣。獨有千年後。青青廟木春。頻詩寫出四皓心事。而頻心事亦自可見。後爲建州刺史。卒于官。民懷其德。立廟梨岳。至今血食不絕。可謂千年廟木春矣。

### 僧聯

方干詩云。慣采藥苗資素饌。每書蕉葉寄新題。予嘗書爲詩僧房中聯。

### 羅隱詩

羅隱詩極淺俗。有江南曲云。江烟濕雨鮫鮓軟。漠漠遠山眉黛淺。水國多愁又有晴。夜槽壓酒



銀船滿綳絲採怨凝曉空吳王臺榭春夢中鴛  
鴦鷓鷯喚不起平鋪綠水眠東風西陵路邊月  
悄悄油壁輕車嫁蘇小奇麗可比溫李然亦不  
多得也

江湖漁隱

韓偓萬里清江萬里天一村桑柘一村烟漁翁  
醉着無人喚過午醒來雪滿船杜荀鶴山雨溪  
風捲釣絲瓦甌蓬底獨斟時醉來睡着無人喚  
流下前灘也不知司空曙釣罷歸來不繫船江  
村月落正堪眠縱然一夜風吹却只在蘆花淺  
水邊陸龜蒙雨後沙虛古岼崩魚梁携入亂雲  
層歸時月墜汀洲暗認得妻兒結網燈四作寫  
江湖漁隱境界如畫自是一家語也

洞賓詩

世傳呂洞賓詩朗吟飛過洞庭湖一絕耳嘗題  
河南錦屏山云半空豁然雷雨收洗出一片瀟  
湘秋長虹倒掛碧天外白雲走上青山頭誰家  
綠樹正啼鳥何處夕陽斜倚樓道人醉卧巖下

自來大身  
白仙骨



石不管人間萬事愁。又云時當海晏河清日白  
鹿閒騎下翠臺本爲君平川裏去不妨却到錦  
屏來。自是仙人風骨。

### 漁山神祠

唐王叡漁山神女祠云。蓮草頭花柳葉裙蒲葵  
樹下舞蠻雲。引領望江遙。滴酒白蘋風。起水生  
紋迎神也。枳枳山響答琵琶。酒滴青莎肉飼鴉。  
樹葉無聲神去後。紙錢飛出木棉花。送神也。真  
可泣鬼神矣。

### 陸羽詩

陸羽著書甚富。今所傳者茶經一種耳。至于詩  
惟六羨歌最膾炙人口。他作鮮有。收者常題會  
稽剡溪詩云。月色寒潮入剡溪。青猿叫斷綠林  
西。昔人已入東流去。空見年年江草齊。可備選  
唐絕者。

### 柳

古人咏柳必比美人。咏美人必比柳。不獨以其  
態相似。亦柔曼兩相宜也。若松檜竹栢用之于



美人則乏婉媚耳唐牛嶠柳枝詞云吳王宮裏  
色偏深一簇纖條萬縷金不憤錢塘蘇小小與  
郎松下結同心亦謂美人不宜松下也譽柳貶  
松殊有深興

詩評二

宋凡二十八則

曹娥廟潘閔詩

李文正公題曹娥廟云死隨枯骨葬江濱報德  
真憐女子身千載斷碑空過眼當時亦有姓曹  
人用事真切亦堪膾炙然不及宋潘道遙一絕  
云曹娥廟前秋草平曹娥廟裏秋月明扁舟一  
宿都無寐近聽江聲似哭聲尤含蓄有味

王元之詩

王禹偁過張處士溪居云雲裏寒溪竹裏橋野  
人居處絕塵囂病來芳草生漁艇睡起殘花落  
酒瓢閒把道衣尋晚照靜携茶鼎洗春潮長洲  
懶吏頻過此爲愛山園有藥苗宋詩之絕佳者  
全集少見謝在杭近抄之內府

響屨廊



王元之題響屧廊云廊壞空留響屧名爲因西  
子繞廊行可憐伍相終朝諫誰記當時曳履聲

### 落花

落花詩始于二宋漢臯佩冷臨江失金谷樓危  
到地香將飛更作迴風舞已落猶存半面妝誠  
絕倡也余襄公云金谷已空新步障馬嵬徒見  
舊香囊至國朝作者愈盛多至三十首矣文徵  
仲云丹葩漂泊明妃淚綠葉差池杜牧情沈啓  
南云錦里門前溪好浣黃陵廟裏鳥還啼近歲  
滇中馬弢叔云武陵路別迴漁艇金谷春深落  
妓釵影搖團扇愁班女艷逐微波度洛妃山東  
于文若云紅樓白日憐珠墜青塚黃昏痛玉埋  
吾鄉董叔允云拂地霓裳迴妙舞凌波羅襪冷  
香魂楚妃腰細難勝雨漢女身輕合避風建溪  
丘文舉云撩亂隋宮拋剪綵漂流秦苑棄餘脂  
建溪魏君屏云馬嵬妃死香猶在垓下人亡血  
未乾余少時亦曾賦十首有云麗華魂散胭脂  
井關盼香消燕子樓雖皆效法二宋然比興之



體亦自俊麗可傳也

西崑

宋楊文公億錢思公惟演李宗諤劉子儀號西  
崑體組織華麗楊南朝詩云五鼓端門漏滴稀  
夜籤聲斷翠華飛繁星曉堞聞鷄度細雨春塲  
射雉歸步試金蓮波濺襪歌翻玉樹涕沾衣龍  
盤王氣終三百猶得澄瀾對敞扉錢和云結綺  
臨春映夕屏景陽鍾動曙星稀潘妃寶釧光如  
晝江令花箋落似飛舴艋凌波朱火度觚稜拂  
漢紫烟微自從飲馬秦淮水蜀柳無因對殿幃  
李和云仙華玉壽曉沉沉三閣齊雲複道深平  
昔金鋪空廢苑于今瓊樹有遺音珠簾映寢方  
成夢麝壁飄香未稱心惆悵雷塘都幾日吟魂  
醉魄已相尋劉和云華林酒滿勸長星青漆樓  
高未稱情麝壁燈迴偏照畫雀航波漲欲浮城  
鍾聲但恐嚴妝晚衣帶那知敵國輕千古風流  
佳麗地盡供哀思與蘭城楊咏始皇云滄波沃  
日虛鞭石白刃凝霜枉鑄金錢云金椎漫築甘



泉道七首還隨督亢圖楊咏成都云漫傳西漢  
祠神馬已見南陽起卧龍錢云雨經蜀市應和  
酒琴到臨邛別寄情楊咏漢武云力通青海求  
龍種死諱文成食馬肝錢云立候東冥邀鶴駕  
窮兵西極待龍媒劉云桑田欲看千年變瓠子  
先成此日歌皆用事精確對偶森嚴卽義山丁  
卯不是過也豈可槩目宋詩爲陳腐哉

### 咏梅

林和靖暗香疎影一聯歐陽公極賞之黃山谷  
以爲不如雪後園林纔半樹水邊籬落忽橫枝  
爲佳我朝高季迪咏梅云詩隨十里尋春路愁  
在三更掛月村似勝

### 瓊林苑

唐宴進士於慈恩寺宋宴進士於瓊林苑苑中  
松栢森列百花芬郁樓觀層列金碧相射韓琦  
詩云春光濃簇寶津樓樓下新波漲鴨頭嘉節  
難逢真上巳賜筵羸入小瀛洲仙園雨過花遺  
靨御陌風長絮滾毬禊飲不須辭巨白清明來



日尚歸休其繁盛光景可見

### 荆公詩

荆公謝公墩詩云我名公字偶相同我屋公墩  
在眼中公去我來墩屬我不應墩姓尚隨公又  
戲贈段約之云竹栢相望數十楹藕花多處復  
開亭如何更欲通南埭割我鍾山一半青雖曰  
戲謔之詞而人我之相見於筆端矣

### 燕子樓

白樂天生平風流獨以絕句逼死矜矜稍爲缺  
陷宋陳薦彥升賦燕子樓云僕射新阡狐兔遊  
侍兒猶在水邊頭樂天才思如春雨斷送芳花  
一夜休似不能無恨于白公也

### 石湖夜步

范石湖夜步詩云人家簾幙夜香飄燈火蕭疎  
照市橋滿院月明春意好小樓吹笛近元宵清  
婉可詠

### 蔡持正鸚鵡詩

蔡持正人品最汙人羞稱之其安置英州日賦



侍兒琵琶鸚鵡一絕鸚鵡言猶在琵琶事已非  
傷心瘴江水同渡不同歸卽唐人莫是過也

### 山靜日長

唐子西山靜似太古日長如小年自羅景綸引  
之世無不知者但未見其全篇耳其題乃醉眠  
也詩云山靜似太古日長如小年餘花猶可醉  
好鳥不妨眠世味門常掩時光簾已便夢中頻  
得句拈筆又忘筌如水裁偏岸直雲截亂山平  
翻泥逢暗筍汲井得飛梅橋林香處飯杉木翠  
邊程硯田無惡歲酒國有長春破窓燈焰走凍  
硯筆鋒遲皆警句也不獨山靜日長兩句耳

### 琴臺

蜀中有相如琴臺古今題咏多本琴心事惟宋  
少傅田况一絕云西漢文章世所知相如閎麗  
冠當時游人不賞凌雲賦只說琴臺是故基亦  
善爲相如解嘲者

### 龜山詩

楊龜山爲吾閩道學之祖世人但知其語錄而



不知龜山之詩亦有可誦者如含雲寺詩云山  
前咫尺市朝賒垣屋蕭條似隱家過客不須携  
鼓吹野塘終日有鳴蛙又云竹間幽徑草成圍  
藜杖穿雲翠滿衣石上坐忘驚覺晚山前明月  
伴人歸又如岳陽樓長歌宛然唐響絕無宋人  
習氣

宋詩工麗

宋洪咨夔直玉堂詩云寶鴨炷雲朝太紫玉蜍  
涴露較鉛黃又云雲收翠戟龍文潤日透金鋪  
獸面明楊萬里云雲翻孔雀金花碧日射鴛鴦  
玉瓦紅皆工麗可誦

委羽居士

宋左緯號委羽居士宣和間以詩名隱黃嶠有  
詩云騎馬出門三月暮楊花無賴雪漫天客情  
惟有夜難過宿處先尋無杜鵑可謂深于旅况  
矣

東臯子

宋戴敏號東臯子浙之黃巖人小園詩云小園



無事日徘徊頻報家僮送酒來惜樹不磨修月  
斧愛花須築避風臺引些渠水添池滿移個柴  
門傍竹開多謝有情雙白鷺暫時飛去又飛回  
雖調不離宋而清淡閒適亦可喜也

### 范香溪

宋香溪范浚南渡後隱居不仕詩有奇思春融  
融云天喧地媚春融融化二點染分花容東風  
夜半入香陌雜樹曉繁爭白紅蘭叢蕙根芳翠  
滴柳艷明媚輕罩歷紅顏綠鬢春客壺中新  
醅鴨頭色殘絲冉冉愁如織日暮低迷草萋碧  
又云海棠紅歇鶯停歌麥風時候猶清和簾垂  
景最深院靜赤闌細柳陰婆娑池塘正覺幽事  
好萍葉藻蔓涵清波一雙胡燕薇叢外啣得芹  
泥來補窠世人所知者心箴而已不知浚之深  
于詩也

### 岳忠武詩

世傳岳忠武滿江紅詞激烈悲壯溢於言外而  
忠武詩句有絕閒靜者如池州齊山翠微亭云



經年塵土滿征衣得得尋芳上翠微  
好水好山看不足馬蹄催趁月明歸  
又如潭水寒生月松風夜帶秋  
何必減唐人語

玉堂陪祀二絕

宋趙汝談直玉堂詩云宮井城鴉欲動時  
春猿夢斷北山移攬衣擬草歸田賦  
猶是金蓮燭半枝潘耒陪祀詩云玉天  
無滓月光寒霽色分明在露盤一夜  
九重全不寐時教中使捲簾看雋  
永有味不似宋格

千巖警句

宋蕭德藻號千巖閩清人以詩名於時  
采蓮曲云清曉去采蓮蓮花帶露鮮  
溪長須急漿不是趁前舩又云相隨  
不覺遠直到暮烟中恐嗔歸得晚今日  
打頭風絕似玉臺劉後村酷稱之

德壽宮壽詩

唐無壽詩有之自宋始至今則濫觴可厭也  
宋高宗爲太上皇壽日楊萬里作慶壽詩云  
長樂宮前望翠華玉皇來賀太皇家  
青天白日仍飛



經年塵土滿征衣得得尋芳上翠微好水好山  
看不足馬蹄催趁月明歸又如潭水寒生月松  
風夜帶秋何必減唐人語

玉堂陪祀二絕

宋趙汝談直玉堂詩云宮井城鴉欲動時春猿  
夢斷北山移攬衣擬草歸田賦猶是金蓮燭半  
枝潘枋陪祀詩云玉天無滓月光寒霽色分明  
在露盤一夜九重全不寐時教中使捲簾看雋  
永有味不似宋格

千巖警句

宋蕭德藻號千巖閩清人以詩名於時采蓮曲  
云清曉去采蓮蓮花帶露鮮溪長須急漿不是  
趁前舩又云相隨不覺遠直到暮烟中恐嗔歸  
得晚今日打頭風絕似玉臺劉後村酷稱之

德壽宮壽詩

唐無壽詩有之自宋始至今則濫觴可厭也宋  
高宗爲太上皇壽日楊萬里作慶壽詩云長樂  
宮前望翠華玉皇來賀太皇家青天白日仍飛



雪錯認東風轉柳花清曉鞭聲出禁中驚開剩  
雨及殘風金鴉銜取紅鸞扇飛上玻璃碧海東  
春色何須羯鼓催君王元日領春回牡丹芍藥  
薔薇朶都向千官帽上開雙金獅子四金龍噴  
出香雲繞殿中太上垂衣今上拜百王曾有個  
家風帝捧瑤觴玉座前綵衣三世祝堯年天皇  
八十一萬歲休說莊椿兩八千天父晨興未出  
房君王忍冷立風廊忽然鳴蹕珠簾捲萬歲聲  
傳震八荒花外班行霧外山何緣子細望龍顏  
小窺玉色真難老底用臞仙九轉丹甘露祥風  
天上來今回恩數賽前回都將四海歡聲裏釀  
作慈皇萬歲杯堯舜同時已甚都祖孫四世古  
今無誰將寫日摹天手畫作皇王盛事圖甲戌  
王春試集英小臣曾是老門生蒼顏華髮鶴行  
裏也聽鈎天九奏聲必如此方可稱壽也

### 仙霞嶺

宋馬子儼宿仙霞嶺詩云月影自催人起早泉  
聲不許客眠安摹寫真切予家在閩北上往來



必由斯嶺輒賞此句不置白玉蟾集亦載此首  
未知孰是

雲龕先生

宋李邴鉅野人叅知政事歸隱泉州自號雲龕  
先生著草堂集一百卷軼弗傳有訪僧詩云數  
丈招提四面山羨師終日掩禪關十年不踏門  
前路只遣松風送我還瀟爽可味

祖孫詩

宋呂雪屋贈陳隨隱父子有句云人羨杜閒生  
杜甫天教蘇頲繼蘇瓌予以庚戌歲得元孫  
人陳伯孺贈予云慙長慙卿終不惡生玄生運  
總多奇用祖孫父子事皆切當

洪陸翁

宋洪漸字陸翁號芑巖淳安人夜泊詩云月浸  
蘆花水浸天漁翁醉後正堪眠夜深何處孤猿  
咽不管江邊有客船清宛可詠

咏針

宋裘萬頃有客令咏針出羨字韻萬頃云一寸



堅剛鍊鑄成綺羅叢裏度平生有時穉子敲成  
釣釣得魚兒便作羨亦巧於押韻可喜也

王介翁

括蒼王鎡字介翁宋室播遷義不仕元宋史稅  
文志謂鎡文集三十卷世尠傳矣近其裔孫之  
棟丞歐寧掇拾家乘得月洞集一帙特片鱗隻  
羽耳如塞上曲云馬嘶經戰地鷗認打圍山秋  
深云子黑石蓮老柿紅霜葉疎山居云香老蒲  
花春洞影涼生榭葉午窓風落葉石闌霜信早  
敗荷池屋雨聲涼杭州懷古云雲寒廢殿排班  
石草卧前朝記事碑時事云雲生殺氣鷗旗暗  
風肅軍聲虎帳寒絕句漁父云竹絲籃裡白魚  
肥日落江頭換酒歸只恐明朝江雪凍老妻連  
夜補蓑衣置之晚唐劉許之間誰辨其爲宋人  
作也

詩評三 元十六則

鹿皮子

元初陳樵好衣鹿皮自號鹿皮子有詩一卷如



掃葉僧將猿共爨賣花人與蝶俱還殊有巧思  
元詩

趙子昂絕句云春寒側側掩重門睡鴨香殘火  
尚溫燕子不來花又落一庭風雨自黃昏滕王  
霄絕句云吟人瘦倚玉闌干酒醒香消午夢殘  
燕子不來春社去一簾疎雨杏花寒二首頗相  
似皆詩餘中絕佳句也唐人無此纖弱之作

真山民詩

偶於陳幼孺案上檢破冊一帙糜爛醯雞前後  
俱損失不存姓氏幼孺云此冊得之邵武仁壽  
寺僧寮中多佳句如蜂王衙早晚燕子社春秋  
烟碧柳出色燒青山返魂白沙難認月黃葉易  
爲霜棠醉風扶起柳眠鶯喚醒檻低簷礙月窓  
破紙吟風與鷗分渚泊邀月共船眠窓月燈昏  
見巖泉雨歇聞花影掃不去草根鋤又生風竹  
有聲畫石泉無操琴許猿分野果留鶴守雲林  
水清明白鷺花落失青苔飛花遊蕩子古木老  
成人途窮身是累痛定語猶悲葉新林掛綠花



落地生香蕉葉捲舒雨鳩聲問荅春七言如雲  
開遠嶂碧千疊雨過落花紅半溪塵書邀我共  
高閣濁酒勸人歸醉鄉碑因藤蔓無完字城爲  
田侵失舊基氣增浙左霜威勁面帶終南山色  
寒書猶能看未爲老詩亦莫吟方是閒寬着庭  
除貪貯月少栽竹樹要看山廊下蝸粘沿砌蘚  
佛前蜂戀插瓶花青山隔絕市朝面白髮消磨  
豪傑心雕鏤花柳春無迹沐浴山川雨有恩花  
影忽生知月到竹梢輕響覺風來皆自矧新意  
雖有酸餽氣亦可喜向不知誰作近讀元人詩  
中有真山民一卷卽此詩也山民西山先生裔

刺馮道

馮道歷事四朝後世羞之歐公作史謂其無廉  
耻史斷諸賢紛紛訾詆百千萬言不如元劉靜  
修一絕約而盡也亡國降臣固位難痴頑老子  
幾朝官朝梁暮晉渾閒事更捨殘骸與契丹獨  
王荆公以伊尹五就湯五就桀稱之近李禿翁  
亦主其說



吳草廬詩

元吳草廬澄專志理學而詩亦多巧思咏雪云  
臘轉鴻鈞歲已殘東風剪水下天壇賸添吳楚  
千江水壓倒秦淮萬里山風竹婆娑銀鳳舞雲  
松偃蹇玉龍寒不知天上誰橫笛吹落瓊花滿  
世間疊葉梅云羅浮夢斷杳無蹤冰雪仙姿兩  
兩逢縞袂怯卑寒後襲彩妝嫌薄曉來濃迎風  
一咲知顏厚臨水相看見影重道眼只將平等  
視玉環飛燕總芙蓉又如百年竹木青春在一  
院香花白晝閒屋頭月上元無夜樹杪風來若  
有期花香靜晝微風裏草色深春一雨餘金鏡  
南飛光欲半銀潢西去寂無聲定非戰國談天  
衍疑是仙家縮地房秋隴故園迷蝶夢曉窓客  
枕厭雞聲等句皆超脫理學蹊徑者也

何太虛

元季詩人踵出知名者無論已予家藏何中知  
非集六卷佳句叠見如燕來春已去花少雨偏  
多漢殿金人別唐陵石馬嘶落花縈樹轉幽鳥



過林鳴山圍雙鷺曉門閉一蟬秋鳥語前林日  
鷄鳴曲巷烟年華流水在春事落花知日明山  
氣改江靜水痕歸七言如赤壁驚鳥飛夜月衡  
陽歸鴈落秋風兩澗寒聲通法席數峰秋影上  
香臺隔水歸樵分路散衝嵐飛鳥認林還水寒  
古道鳴駝外雪暗空村落鴈邊馬嘶平野呼鷹  
吏犬吠寒沙射鴈人中字太虛臨川人集中所  
往還者吳澄劉會孟揭奚斯程鉅夫諸人至大  
皇慶間寄寓閩中賦詩頗多所著有易類象二  
卷書傳補通十卷通鑑測海一卷通書問一卷  
吳才老叶韻補疑一卷六書綱領一卷補逸六  
書故三十二卷薊丘游錄一卷搢願錄十卷知  
非集十七卷外集十六卷可謂富矣然姓名泯  
泯不與吳揭鴈行胡元瑞詩藪拈拔元人佳句  
無遺亦不及太虛真有幸有不幸也

題和靖墓

古今題和靖先生墓者不下百篇悉梅鶴封禪  
數事而已獨張羽一絕云水繞荒山路半斜墓



園無主屬官家我來正是梅開日滿目蓬蒿不見花淡而有味更陳剛中一絕云北邙翁仲拱朱門玉盃時驚古帝魂爭似孤山一抔土梅花依舊月黃昏亦可掩諸作者也

陳剛中

元陳剛中使交南詩云老母粵南垂白髮病妻燕北寄黃昏蠻烟瘴雨交州客三處相思一夢魂真一字一淚

同根竹

武夷城高巖有巨竹一幹雙稍予與謝在杭欲賦詩詠之未就也偶閱元人謝宗可詩云競秀亭亭一種奇駢頭曾脫錦裯兒西山二子情依舊湘浦雙娥影鎮隨高節元非連理樹虚心共是傲霜枝莫教移作仙人杖恐化雌雄下葛陂似不能復繼矣

盧圭齋詩

泉州惠安盧圭齋名琦字希韓登元至正進士令永春改寧德所著有圭齋詩集歲久弗傳近



惠安莊戶部徵甫蒐而梓之悞入鴈門薩天錫  
詩六十餘首薩詩世有傳本較者一時未之考  
耳亟當釐正不然恐後世以圭齋爲齊丘之盜  
化書也盧詩自佳如嵐氣滿林晴亦雨溪聲近  
驛夜如秋潮生遠浦孤帆小雨過蒼崖古木寒  
小橋跨澗村春急老樹吹花野店香暮雲松徑  
僧歸寺夜雨蓬窓客在船門掩落花春去後夢  
回殘月酒醒時梧葉幾番深夜雨梅花一樹短  
籬霜清典可詠元詩多纖弱若圭齋者實有唐  
調者也

月泉吟社

元至元間浦江吳清翁渭有月泉吟社預於丙  
戌小春月望命題至正月望收卷用好紙楷書  
謄副聘謝翱爲考官三月三日揭曉收二千七  
百三十五卷選中二百八十名首名羅公福吟  
社中人詩限五七言律刻至六十名止皆有詩  
賞者也第一名公服羅一縑七丈筆五帖墨五  
笏第二名公服羅六丈筆四帖墨四笏第三名



公服羅五丈筆三帖墨三笏第四至十名各春  
衫羅一縑筆二帖墨二笏第十一至二十名深  
衣布一縑筆一帖墨一笏第二十一名至三十  
名各深衣布一縑筆一帖第三十一名至五十  
名各筆一帖墨一笏吟箋二沓詩以春日田園  
雜興爲題公福詩云老我無心出市朝東風林  
壑自逍遙一犁好雨秧初種幾道寒泉藥旋澆  
放犢曉登雲外壠聽鶯時立柳邊橋池塘見說  
生新草已許吟魂入夢招李西涯懷麓堂詩話  
亦載此事言此集未及見予家有藏本因錄出  
之然佳句甚多不獨公福也

公福本姓連名文  
鳳吾閩人字伯正

號應山僞名羅公福  
集中皆不署的名

如屋角枯藤粘樹活田頭

野水入溪渾青林伐鼓村村社綠水平疇處處  
秧土脉正融催穀赫林陰微合聽鞦韆田鳥飛  
逐耕烟犢桑扈鳴隨喚雨鳩草青隨意牛羊卧  
門靜無人燕雀多麥壟風微牛睡穩芹塘泥滑  
燕歸忙小雨杏花村問酒淡烟楊柳巷巾車榆  
莢雨酣新水滑棟花風軟薄寒收又皆六十人



中警句也

張思廉

元季詩人輩出語皆奇警句會稽張思廉尤峭峻  
可喜題唐五王擊毬圖云興慶宮前春正熱綠  
楊夾道花如雪毬門風起日西斜五馬歸來汗  
成血潞州別駕醉眼纈雙袖傾欹擁岐薛申王  
按鞚宋王馳杖撲毬囊手親挈草平如掌馬力  
均玉鞭十里不動塵黃門扶入五花帳大衾長  
枕娛家人花萼相輝雨氣寒樓中歌管漸闌殘  
紫騮不踏毬場路萬里青驪蜀道難又太真明  
皇並笛圖黑奴絃索花奴鼓譟奴撫掌闈奴舞  
阿嬌自品玉璫龍御手夷猶親按譜風生龍爪  
玉星香露濕櫻桃金縷長莫倚花深人不見李  
暮側足傍宮墻思廉有玉笥集十卷詩多富贍  
蓋熟于史學者以方駕鍊厓未知鹿死誰手

岑安卿

至正中餘姚岑安卿字靜能號栲栳山人有集  
一卷平淡不類元習如蛩鳴深巷靜月昃半樓





原件短缺

P34以后缺



明山高不礙夢日落易生愁清新有味亦胡元  
瑞所未覩也

趙大年畫

元吳淵頴題趙大年林塘秋晚圖云老景青黃  
筆底收晴鳧冷鴈共汀洲王孫畫學空花竹不  
到銅駝陌上秋譏刺之意微而婉矣

金青村

元末金青村涓與邑人吳萊宋濂友善有詩名  
嘗賦詩云燕子飛來近畫簷暮春時節雨纖纖

徐氏筆精卷四

晉安徐 煥興公誤輯

同里邵捷春肇復訂定

溫陵黃居中明立編次

詩評四 明五十八則

恭靖王

肅藩恭靖王博雅善詩塞上曲云遠出漁陽北  
擊胡將軍談笑挽雕弧千金底購單于首贖得  
得沙場戰骨無有王龍標之致



宗藩詩

國朝宗藩之詩寧府爲盛諸王孫以詩鳴者多  
炆多熾其著者也多炆絕句清逸如泊長蕩云  
蒹葭一望暮蒼蒼長蕩湖頭烟水長怪道今朝  
楓葉盡夜來七十二橋霜湖口縣云湖水澄清  
江水渾江烟湖靄易黃昏請看湖口江心月一  
片寒光照縣門清明湖上云湖畔行吟日未斜  
四年三度客天涯不知鷓鴣驚飛去穿破來禽  
滿樹花多熾屬對精工如太室出雲來署裏黃  
河如帶掛城頭關山曉月趨三輔鴻鴈秋霜度  
九河路經軒后臨戎坂山接高歡避暑宮皆翩  
翩爾雅無純袴習氣

過餘干弋陽詩

貞吉王孫過餘干詩云餘汗城頭雲泊天琵琶  
洲下水如弦推篷理詠隨州句落日平沙似往  
年謝在杭宿弋陽云羣峰迴合俯清溪寂莫荒  
城古渡西惟有女墻秋月在只今猶照夜烏啼  
二詩皆用劉隨州句略無痕迹

余近過弋陽亦效輦云頗憶文



房舊日題餘干水落弋陽溪平沙  
渺渺孤城在朝暮猶聞山鳥啼

### 汪廣洋

汪廣洋詩云三百六十灘水清桃花春浪近來  
生催歸不待臨歧語夜夜子規啼到明酷似晚  
唐

### 郵亭圖

國初唐肅題陶穀郵亭圖云紫鳳檀槽綠髮娼  
玉堂見慣可尋常作歌未必腸能斷明日聽歌  
更斷腸先兄惟和曾題秦弱蘭一首足爲陶學  
士解嘲莫笑郵亭一夜春此身元已落風塵韓  
家亦有如花女枕畔衣裳着向人

### 王止仲

吳郡王止仲名行國初布衣也王文恪筆記稱  
其才敏嘗識姚廣孝于未遇余嘗得楊文敏公  
遺書中有王行半軒文集十二卷寫本也其詩  
不甚多如高館疎簾晚乍開讀書聲裏故人來  
山中本自無塵土催得家僮掃綠苔清逸可誦  
文敏去止仲甚邇卽爲之抄錄想當時無刻板



耳今又二百餘年恐吳人亦未必有也

震澤長語載其

初備于金閭徐姓竊書讀之後為南京武臣教授上召見武臣怪其識見特進以實告召見語不合賜死

### 藍明之靜之

武夷藍明之名智永樂中辟為廣西僉憲與兄布衣靜之齊名詩詞俊逸雅有唐風嘗見其書銅雀臺瓦詩于建陽友人處可泣鬼神詩云曹瞞騁志吞劉社銅雀臺高瞰中夏徒知扼腕有臥龍豈料垂涎已司馬萬里河山尚出師九原魂魄歸何時清秋風雨滿陵樹落日笙歌空總帷翠蛾紅袖恩情絕廢塚荒臺狐兔穴空餘片瓦落人間千載奸雄磨未滅藍靜之紙帳詩云數幅秋藤拂地齊匡牀閒對竹爐低山中一枕梅花月不識雞聲送馬蹄

### 瓊姬墓

吳中有夫差女瓊姬墓高季迪詩云夢別芙蓉殿頭墮釵零落誰收土昏青鏡忘曉月冷珠襦恨秋麋鹿昔來廢苑牛羊今上荒丘香魂若怨



亾國莫與西施共遊六言最難佳此篇警策雋  
永求之古今不多見也

### 聽潮軒

國朝張寧題聽潮軒詩有云天涯共道初來懼  
夢裏空驚夜語時用唐人詩句新巧

黃旂山

黃增莊  
擊壤附

黃旂山諱澤字敷仲閩之侯官人也永樂辛卯  
以詩魁省闈壬辰成進士超拜河南參政繼復  
叅湖廣擢浙江左轄以憂去再奪情於浙前後  
在浙十餘年奏罷無徵米百三十六萬石七冶  
課銀九萬兩劾罷貪守令五十七人竟爲其黨  
所中逐之去時正統六年也亡何土木變起大  
盜克斥而公先憂之計驗歸田後一意著述時  
與文人韵士頡頏唱酬其詩間雜俚語雖未脫  
宋元習氣然清揚瀟散婉而多風不作窮愁拂  
鬱語今錄其五言古幽居發長嘆嘆彼東隣姬  
芳年得佳婿跬步無睽離光陰逐逝水雲鬢今  
成絲良人沒沙漠訃聞如不知開窗拂鸞鏡染



黛描雙眉自矜新寵盛却笑傍人癡古來漆室  
女何事傾國葵我廬旂山陽我墓旂山麓薄田  
百畝餘亦足供餽粥有廬可庇棲有墓足埋玉  
人生百年身譬彼高堂燭聖人恒戒盈達士貴  
知勛嗟嗟旂山翁永言保清福五言律兩歇夕  
陽斜孤舟掛落霞城頭聞戍角海口見人家衰  
鬢驚秋葉歸心逐暮鴉今宵何處泊棹月入蘆  
花直沽臨安多沃土宜麥復宜蠶塔影錢王墓  
鐘聲淨土菴吳衣輕白苧越果重黃柑父老何  
爲者官亭候使驂臨安卽景扁舟上石灘沙淺水痕  
乾白首忘機久清時謝病難蓬牕孤月暝鄉夢  
五更殘明發常山道霜風拂面寒塔溪夜泊臺閣雲  
霄上蒼蒼日鑿臨莫張虞氏網須辨漢郎金臣  
道如絃直君恩若海深南歸返初服永遂老農  
心出獄風塵遊歷久天與老來閑去國長憂國還  
山少出山人煙秋水外釣艇夕陽間不是無交  
接雲深戶自關歸自紹興七言律鰲峰雪霽喜春和  
仙佩翩翩候晚過玉宇無雲留壁月星橋有路



上銀河九重閭闔喧簫鼓十二街衢度綺羅深

荷幸生堯舜世年年侍宴沐恩波

戊戌元夕

江水微

茫漾綠波花前勸酒唱離歌郎心似水東流急

妾貌如花奈別何孤棹斜陽郎去遠重門細雨

妾愁多封侯早佩黃金印百歲光陰一織梭

惜別

帝城漏盡禁鐘清玉珮瑤瑤進列卿風捲龍旂

開鹵簿雲隨鳳輦出蓬瀛班分銀燭移花影樂

奏仙韶繞仗聲侍宴丹霄歸獨後垂鞭紫陌馬

蹄輕早無諸城外雨初收江柳依依暫繫舟上

國風雲憐遠別故山花木憶同遊簾垂盡省晨

開閣門掩孤村夕倚樓返棹重來尋舊好一樽

相候碧溪頭

別友

天風吹袂上層臺雲外湖山次

第開帆影暝隨孤鳥沒秋聲遙帶暮潮來翫花

池涸餘衰柳響屐廊空半綠苔寂莫不須傷往

事登臨且醉菊花杯

九日登靈岩山

水落蘇堤見斷橋

栖霞嶺下駐蘭橈東西兩樹悲風起南北諸陵

王氣消遺廟殘碑春寂寂臥麟芳艸雨瀟瀟古

今多少登臨恨半付江雲半海潮

岳王廟

龍躍雲



上銀河九重閭闔喧簫鼓十二街衢度綺羅深

荷幸生堯舜世年年侍宴沐恩波戊戌元夕江水微

茫漾綠波花前勸酒唱離歌郎心似水東流急

妾貌如花奈別何孤棹斜陽郎去遠重門細雨

妾愁多封侯早佩黃金印百歲光陰一織梭惜別

帝城漏盡禁鐘清玉珮瑤瑤進列卿風捲龍旂

開鹵簿雲隨鳳輦出蓬瀛班分銀燭移花影樂

奏仙韶繞仗聲侍宴丹霄歸獨後垂鞭紫陌馬

蹄輕早朝無諸城外雨初收江柳依依暫繫舟上

國風雲憐遠別故山花木憶同遊簾垂盡省晨

開閣門掩孤村夕倚樓返棹重來尋舊好一樽

相候碧溪頭別友天風吹袂上層臺雲外湖山次

第開帆影暝隨孤鳥沒秋聲遙帶暮潮來翫花

池涸餘衰柳響屐廊空半綠苔寂寞不須傷往

事登臨且醉菊花杯九日登靈岩山水落蘇堤見斷橋

栖霞嶺下駐蘭橈東西兩樹悲風起南北諸陵

王氣消遺廟殘碑春寂寂臥麟芳艸雨瀟瀟古

今多少登臨恨半付江雲半海潮岳王廟龍躍雲



飛幸有期託交況在布衣時九重詔向桐江起

五夜星從御榻移碧海天空鴻去遠彤庭春晚

鳳歸遲如今寂寞荒臺上烟雨冥濛濕釣絲先嚴

生祠遠山迢遞上青霄回首吳城路轉遙十載功

名勞夢寐半生蹤跡愧漁樵蒼苔古道連危棧

曲澗流澌擁斷橋明出梨關歸興動隔溪喜見

木蘭橈自浙回閩客懷寥落歎離居況復他鄉遇歲

除積水連天帆影沒平蕪飛雪雁行疎何須凍

筆題愁劄未必浮雲蔽太虛霄漢春來多雨露

九重應見鳳銜書淮陽柴門雨過稻花香獨步

松陰趁晚涼上疏謫來憐賈誼辭封歸去想張

良山中有豹藏深霧渭曲何人釣夕陽昏黑莫

行林外路淋漓草露濕衣裳雨後晚步劣削峰高紫

翠深閑隨飛錫到雲林橋邊草露霑行屐磻外

松風度梵音霄漢昔勞青嶂夢烟霞今遂白頭

心忘形共了三生約蓮社相過日抱琴遊鼓山寺落

職南歸逸興多倚雲閑唱伐檀歌新開池館移

松菊舊隱巖扉剪薜蘿細雨半坡黃犢草清風



一棹白鷗波林泉隔斷紅塵夢不識春城有綺

羅山莊誰搗霜藤換絳紗更將凍墨洒寒花刻

溪人去芳魂斷庾嶺春歸別夢餘欹枕醉疑雲

蕩漾擁衾吟愛日橫斜清風不逐豪華盡流落

山林處士家梅花紙帳一氣初分水最先龍湫源出

此山巔塘開太液池邊石波漾滄溟鏡底天濕

漲溶溶紅杏雨晴生淡淡綠蕪烟品題今入歐

蘇筆長得清名在簡編石塘春波禹會諸侯在會稽

何緣隣境得玄圭松烟浥露薰龍腦花氣凝香

入麝臍半笏穹隆從地起一峰突兀與天齊羣

英接武青雲上俯視衡嵩崕雙墨鍾英嘷低衰軀漸

覺病來侵炎溽蒸人更不禁解渴每思水在澗

閉門還怯暑消金涼飄落葉疑秋早月滿虛堂

喜夜深四海蒼生共憔悴濟時誰解作甘霖病中

苦熱石仙潭下買荒原綠麓周圍十畝園竹塢疎

籬新院落桃花流水舊溪源青山對酒晴移席

綠樹垂陰晝掩門浮世纖塵飛不到此中此意

自忘言山居十二天閑閨苑西奚官調護異後猊



水刀不剪青絲尾月斧曾修碧玉蹄陪直每知  
依仗立向人多是隔花嘶幾回賜浴龍池上一

道芳塵過御堤

三驥圖

疊障迢遙擁畫屏凌雲寶

刹耀丹青長廊人設松花供丈室僧翻貝葉經  
夜永禪燈光耿耿春深祇樹影亭亭隨緣且了

三生約不啻流年兩鬢星

瞿雲古刹

新種南園玉一

叢半含粉穉半搖風數殼曼曼龍吟水片影翩  
翩鳳下空獨伴蒼松霜後綠肯依繁杏日邊紅

白頭野老歌淇澳清節相期保始終

顧侍御園翠竹搖風

七言  
蕭條白髮新古來憂道不憂貧一

樽獨向東籬坐却愛黃花似故人

初冬病起

七言歌

行題諸葛武侯像炎精沉赤龍死五陵松柏號

秋雨鑿輿幸許謀已成天下紛紛各為主先生

自是人中豪頡頏管樂輕孫曹雲窩久蟄一朝

起三軍奔走隨旌旄間關隴蜀忘勞瘁欲掃妖

氛剪吳魏五丈陰霾暗將星江流不盡當年淚

凜凜英魂今有無錦城冷落故宮蕪汗青千載

芳名在塵世空驚八陣圖題息上人聽松樓南



冥息上人深居絕塵想鋤雲種青松隨白雲  
長禪心何悠悠開樓坐閑敞微風天上來木末  
動清響初疑琴聲絃上起非角非商亦非徵又  
疑山陽鍊笛聲嗚嗚雙蛟夜泣寒潭水清如玄  
都仙人騎鸞上玉京疾如長江風帆日走三千  
里疾而徐廣庭涼夜吹笙竽芭蕉卷綠雨聲碎  
池荷瀉露驚遊魚疏而數九臯月冷聞孤雀蕭  
蕭黃葉堦下飛簌簌風泉澗邊落陰晴風雨聲  
隨變老衲聽之渾不厭俗耳昏聾豈解聞塵眸  
茫昧何由見駢駢四牡黃華使公餘偶向名山  
去松下逢人問所之相邀直到雲深處琳宮寶  
剎何崔嵬高樓百仞雲中開徂徠秀色滿窓戶  
虬枝曼曼鳴春雷須臾坐定風轉息萬籟無聲  
山寂寂上人索我聽松詩醉墨淋漓掃樓壁詩  
成相對已忘言松月娟娟松露滴上征夷王將  
軍金門朝啓初日紅珊瑚環珮搖春風宰臣稽  
首上邊報綸音渙發徵才雄賢侯自是三槐裔  
文武全才冠當世品士論兵邁古風舉旗斬將



多奇計清晨受脤辭帝京百官出餞金陵城龍  
旗高拂野天迴鼉鼓長擊江湖平樓船六月來  
南楚雞犬不驚民按堵虬髯劍士氣成虹碧眼  
材官力如虎交城到日瘴烟收馬箠投江江不  
流伐謀悉聽將軍令敵愾深紆聖主憂旬宣有  
道風行草殲厥渠魁慎天討散財發粟拔沉微  
耄倪共慶來蘇早九重注意在遺黎露布應將  
大筆題請看漢代麒麟閣爲問元勳孰與齊題  
余將軍借翠軒括蒼之山凌紫烟石門丹洞遙  
相連飛湍千尺瀉寒玉晴峰萬葉開青蓮何人  
甲第山之麓鳳舞龍飛長在目暮靄朝雲繞座  
浮高梧疎竹依窗綠公餘對此塵慮消輕裘緩  
帶風飄飄芸香積案書千卷花影當簾酒一瓢  
君不見謝安石瀟洒東山恣登歷又不見康樂  
侯政成好入山中遊將軍愛山不出戶借此翠  
色供吟眸笑余亦有林泉癖海內名山徧行跡  
明當振珮上蓬萊浩蕩天風送蜚鳥括山青遙  
相憶題前嶼莊我志在遺安卜築得前嶼門巷



隔塵囂靜中有真趣別築亭臺大宅西閑時登  
眺拂烟霓臺江遠樹雲邊斷劣崩晴峰鳥外低  
鳳岡春雨莓苔綠旂纒秋雲長在目南風小圃  
荔枝紅香露平疇晚禾熟沙浦寒流漾碧潮樟  
林斜日度歸樵漁樵不作簪纓夢蹤跡何由到  
市朝石林昏青障曉雀在雲松魚在沼白髮柴  
門長子孫江湖故舊歸來少喬木蒼蒼舊縉紳  
諸郎守道莫憂貧牀頭萬卷遺書在期爾清修  
繼古人沙鱗歌沙上鱗何橫行爪甲纖利雙睛

明江湖取食日已飽香膏凝雪光熒熒自矜老  
大無驚駭豈料秋容暗中改易牙調味喜清新  
玉甕橙齏竟成醢巍巍廊廟姿竊權蔽光彩君  
不見沙上鱗題梅花君不見河陽地煖桃花紅  
繁英着雨餘空叢又不見湘江蘋蓼含秋色一  
夕微霜竟蕭瑟浮艷紛紛不耐看曾似孤芳雪  
中白石根鍊幹冰玉胎皴皮半裂封莓苔暗香  
浮動風前度疎影橫斜月下來列仙雜遝朝丹  
闕羽蓋霓旌起超忽醉乘雀馭下瑤臺無數遺



珠落香雪山澤癯宮苑腴照水懸巖體總殊楊  
王筆意久寂寞當途太守今有無羨君家住西  
湖曲萬頃湖光映書屋氣接孤山一脈春眼空  
浮世千鍾粟豈料功名自有期十年薇省鬢成  
絲老天堅爾青青實金鼎和羹想未遲白雀歌  
松頭雀高且清縞衣玄裳朱頂明林空月冷萬  
籟息仰天引頸而長鳴長鳴飛入青雲表俯視  
鷓鴣一毫渺鸞臺鳳閣春沉沉不重仙禽重凡  
鳥瑤池有水亦有芝不飲不啄心如癡飄然直  
返故巢去白雲却訝歸來遲新巢漸多松轉密  
此鳴彼和甘岑寂諸雛長大毛骨奇儀表天朝  
還有日漁父詞漁翁家住青溪上生來不帶封  
侯相早年結得白鷗盟梗跡萍踪甘蕩漾桃花  
源頭春水生執篙童子船邊撐綸竿在手隨所  
適眼中萬事鴻毛輕江村晷日人爲市聒耳煩  
囂算微利蒲帆半幅西復東似厭炎塵上衣袂  
新蓴長葉鱸漸肥瓦缸酒熟銜杯時推篷見月  
如有待傍舟何事歸來遲同雲作霰風飄忽披



簑獨釣寒江雪直鉤無餌那得魚坐對空山笑  
衰拙滄浪濁滄浪清濁斯濯足清濯纓桐江一  
絲扶九鼎至今清史流芳聲題歲寒三友君不  
見花與柳嫩綠嬌紅隨處有無情惟解賞芳菲  
誰信芳菲易衰朽又不見松竹梅玉幹瓊枝產  
深谷幽人擬結歲寒盟移種庭前蔭書屋嚴冬  
草木皆零落三樹蒼蒼宛如昨我心相配金石  
堅甘抱長材老丘壑九重恩下徵賢詔萬里青  
雲豁長嘯濟時事業須早爲廟廊未可輕年少  
公以直道被讒一去不復廢居三十年不忘憂  
國其清風勁節所謂薑桂老猶辣者鄧汝高閩  
中正聲徐惟和晉安風雅槩未之及豈遺集久  
湮不獲寓目耶余特爲表出以志高山之仰云  
又國初有莊希俊者亦閩人生元季不仕  
聖祖龍興辟倅臨洮擢濟南太守有擊壤集一  
卷其咏牡丹云亭臺幽處鎖芳菲一捻春姿百  
寶圍色借丹砂連曉瑩肌生紅玉藹晴暉風飄  
香入玻璃酒露潤光添錦繡幃每滯遊人歸興



晚接羅倒着步蟾輝繞屋清陰玉樹連春深花  
笑雨餘天紅潮醉臉施輕粉綠慘愁蛾掃翠烟  
合榭天香風細細半窗鸞影月娟娟清平一曲  
稀人和且向罇前問絳仙獨掃蒼苔坐錦叢金  
尊綠酒蘸輕紅鶴翎濕露梳晴日蝶翅黏香趁  
曉風粉黛藏羞綃帳裏丹青難寫素屏中醉來  
捲幔窺明鏡似約仙娥在月宮半酣卯酒醉斜  
曛綽約宮粧自不羣膏雨弄晴新賜浴薰風煦  
暖暗飄芬錦襜珠佩垂腰袂玉葉瓊枝壓鬢雲  
麗質厭隨桃李列殿春獨舞絳羅裙咏紅梅云  
綺雲散彩篆烟斜萬象光中雨寶花碧玉明珠  
天女珮青樓朱箔美人家蘭堂夜暖流蘇帳蓬  
府春生伏火砂回首桃溪顏色早已隨流水泛  
殘霞夜來微雨浥芳叢洗淨鉛華笑靨紅飛觀  
簾開迎海日廣庭鸞舞落天風霓裳光動歌聲  
裏繡被香溫醉夢中坐久忽驚清露冷恍疑身  
在蕊珠宮膏雨收晴布暖曛芳姿步出萬花羣  
鳳冠高簇開新艷雞舌初含吐異芬羅襪輕塵



凌洛浦歌臺緩響遏卿雲可憐飛燕嬌無力莫  
遣東風蕩繡裙又灞橋風雪一絕六花飛壓帽  
簷低十里西風楊柳堤詩興不知何處去蹇驢  
空過灞橋西又題漁樵問答云漁翁繫船清溪  
濱樵夫息肩臨水瀕欣然抵掌坐盤石苦樂何  
妨同討論漁翁問樵長所苦朝去暮來冒風雨  
層巒絕壁難躋攀幽徑荒林足豺虎何如一葉  
隨中流風清月白涼颼颼瓦甌蓬底動春酌去  
去來來長自由樵夫答云誰所愠雨笠烟蓑足  
風韻曉來腰斧入寒林晚去舒遲忘遠近行行  
且誦復歌歌暮去朝來樂更多擔柴入市換春  
酒醉來和月眠春坡樵夫復問漁翁苦窄窄孤  
篷無定宇風波旦夕相喧逐短棹長篙那得主  
何如林下長嬉遊或薪或械忘春秋時來卽作  
會稽守命薄從教空白頭漁翁荅言余所樂蓼  
岸蘋洲隨意泊女兒江口日初長新婦磯頭潮  
未落麴麴一枕蓬底眠醒來猶在蘆花邊人間  
若訪玄真子何異隨流覓水仙兩言問答皆云



爾苦樂平分忘彼此相携一笑暮雲橫坎遇流  
行隨所止詩皆清麗直攄胸臆亦足傳也

贈道士詩

宣德間吉水羅明贈道士云金碧樓臺倚半空  
松花不掃白雲封紫綃製氎烟霞色斑竹裁冠  
玳瑁容龍角捲來天上雨鶴翎梳破樹頭風世  
人若問長生訣洞裏桃花幾遍紅新巧可咏

樵林居士

天順中淮南蔣主孝恭靖公子也自號樵林居  
士諸家選詩皆不及焉有五王擊毬圖云毬門  
高結春如海紫袖垂垂剪雙彩薛王力倦宋王  
來興慶官前花正開侍兒弄笛申王醉更有歧  
王擁花睡春風不動草如鋪兄弟相隨入畫圖  
黃門擁入五花帳官奴謾鼓花奴唱博山火蒸  
水沉香富貴從來自天降遲遲春日下龍樓花  
萼連輝雨氣浮大被漸寒歌管歇三郎別領阿  
環遊較元張思廉亦伯仲間也

威寧伯



國朝威寧伯王襄敏公以文臣而三佩將印特  
勅獎諭二十餘次歿後諭祭九壇歷任四十餘  
年身臨戰陣一百九十四次生擒達賊二百九  
十名斬首三千三百顆奪獲戰馬駱駝牛羊以  
數十萬計子孫世世承襲給以鍤券書生之寵  
遇未有若此之極者也然公詩氣魄雄壯不事  
磨鍊自見遠大如斬蛇赤帝留神劍墮淚銅仙  
泣露盤風向眼中吹出淚霜於髯上凍成冰三  
緘已鋼金人口百鍊難消鍊漢心六國竟銷蘇  
子印萬金空鑄鄧通錢仕宦得閒方是貴世途  
雖好不如歸妄夢幾時曾得鹿多歧何處不亾  
羊公馳驅戎馬之間而賦咏不輟未可與操觚  
翰苑者並論也然阿附權闈不無微玷云

### 八歲詩

弘治間金陵謝子象有詩名八歲時客命賦暮  
秋詩謝曰紫塞風寒雁叫霜秋花薰夢一樓空  
客驚爲奇童後從吳郎中元玉學詩有深林下  
馬蒼苔滑野寺入門秋爽多之句一時傳誦謝



贈刑部主事子應午官河南參議刻其全集佳句甚多不特此也

魏竹溪

黃增

余閱燈市有魏竹溪詩多雋永可味佚其半得之郭聖僕合璧焉初不知竹溪何人也載讀其序言則家學憲未軒先生筆乃知竹溪名時敏少游鄉技以才辟爲邑從事治文書之暇不輟翰墨或揮毫作山水而尤篤于詩謁選銓曹冢宰尹公試以詩有簡拔自慙非漢吏威儀今喜識周官之句深加器賞超除無錫丞復除桃源丞所至皆有題咏致政里居薦紳學士多與酬唱年八十餘未嘗一日廢吟事也其五言若寄吳太守孤燈殘夜夢千里故人心送林郎中致仕烟雲新世態花竹舊郊居其七言若懷江湖故人千里宦情星拱北百年人事水流東秋日病起黃花籬落家家酒白雁江天處處砧寄余汝盛間吟有客知何遜獨酌無人識馬周尤爲學憲擊節余所賞者五絕亭小貯琴聲池清蘸



花影曉日上窗紗幽人夢初醒軒露濕一庭

苔鴉啼長門樹寂莫對孤螢飛入昭陽去長門

絕六雪裏青山茅屋雨中芳草溪橋野艇空橫古

渡滄江自落寒潮野水渾通籬落川源綠繞桑

麻雲裏數聲雞犬山深更有人家流水半沉石

脚浮嵐橫抹山腰閑却小亭孤棹幽人遠上雲

霄俱題歲晚行尋溪上春風遙憶隴頭何處一

聲長笛月明醉倚南樓咏七絕郎去西湖莫賦

詩詩情到處誤歸期妾心一似湖中藕不斷長

絲與短絲竹枝詞短籬疎雨正離披淡白深紅朶

朶宜自計老年才思減重陽過後不題詩賞郎

駕扁舟泛五湖不知湖水幾時枯願郎早過黃

陵廟苦竹叢邊聽鷓鴣去日栽松一尺強如今

已見倚雲長不知萬里關山夜清夢曾無到故

鄉別後衡門鎮不開年年春雨長莓苔東風似

欲添離恨故引雙飛燕子來聞聞說沙場雪未

乾移師又欲破樓闌憑誰為借東風力吹轉三

邊地不寒征婦社鼓聲喧送酒盃春風落盡一



庭梅不知白首狂吟客醉飲屠蘇更幾回

殘年 煬

帝宮前春已深含烟帶雨自陰陰柳條縱有三  
千丈難繫離人一寸心嫩葉柔條拂短簷鶯啼

燕語曉風恬傷春無計留春住怕見飛花不捲

簾

折楊柳

五律秋夜懷楊大使孤館涼風發長天

白雁過旅懷秋易斷鄉思夜偏多野曠雲連樹

江寒月浸波不知楊子宅秋興近如何和除夜

梅花送殘臈草色報新年客夢雞聲裡鄉心雁

影邊髮隨時事改酒爲故人延却憶滄江上蘆

花隱釣船和王文偉最喜投閒日蓴鱸正及秋

鐘聲林下寺燈影水邊樓老去仍青眼吟多易

白頭還思爲客處梧雨滴鄉愁除夕宿大雲院

巖風吹野樹溪雨浸山田自汲烹茶水誰供買

酒錢苦吟方得句多病只貪眠不管人間事清

閑過歲年寄姑蘇劉欽謨清貧終不厭未老亦

宜休楊柳聞門曉蒹葭笠澤秋園蔬乘雨種林

菓帶霜收感慨應懷古題詩上虎丘寄周崔洲

太守風雨越江邊郵亭對夜眠鄉心孤島迥客



思一燈懸論舊懷他日談詩記往年離魂將別  
夢幾度到臨川尋幽臨絕壑春望倚晴闌舉世  
情皆薄謀生道更難雲邊雙闕迥林下一官寒  
自笑卑栖意塵冠未敢彈七律寄余汝盛久旱  
村園豆麥焦鑿池引水灌田苗籬疎野竹橫窗  
戶潮滿春帆碍浦橋酌酒不愁無苜蓿揮毫深  
喜有芭蕉人生適意應如此莫怪淵明嬾折腰  
琴川道中斷雁聲寒隴日昏盡船撾鼓入孤村  
燈前感舊無書劄枕上思親有夢魂短髮尚紆  
新宦牒好懷都負舊琴樽題詩却憶山莊下風  
雨瀟瀟晝掩門去婦辭鴛鴦帳留春上錦文高堂  
賓客賀新婚穠華似玉生蘭砌衰落如花棄草  
根薄命謾垂今日淚愁顏猶憶舊時恩班姬純  
扇秋風早滿院蒼苔獨閉門夏日寄高尊卿州  
守林屋虛寒半掩扉野情偏稱綠荷衣柳風乍  
起燕雛軟梅雨初晴荔子肥歲月無情催客老  
溪山有意待君歸浮沉世事何須問好整絲綸  
坐釣磯效李商隱咏浹香閨頻蹙遠山眉不似



昭君出嫁時有恨染斑湘浦竹多情讀罷岷山  
碑殘春故國難爲別撫景新亭空對垂蓋世英  
雄亦如此楚歌聲斷益堪悲橋成織女歛雙眉  
雨洒人間七夕時書寄邊鴻持舊節劔留孤塚  
對殘碑鮫人雙袖因珠濕和氏千行有玉垂笑  
殺步兵狂太甚窮途回首不勝悲寄黃文大化  
州使節遙臨嶺海西桄榔椰葉暗春溪連村禾  
黍沉雲綠繞廓桑麻似掌齊夜月滿城無吠犬  
晨烟隨處有鳴雞太平氣象多吟咏喜雨亭前  
取次題懶菴萬事無心酒一瓢庭前積雪待春  
消稽康箕踞真成癖陶令歸來懶折腰看竹熟  
知傍舍近尋詩生怕出城遙紛紛裘馬紅塵裏  
忙聽鐘聲趁早朝題淵明歸五柳圖栗里柴桑  
秋正深歸舟尤喜遂初心閑情都付籬邊菊佳  
趣惟留壁上琴紅葉客來長不埽白衣人去自  
成吟一從蓮社攢眉後直向山中醉到今殘年  
書事塞雁驚寒下浦沙故人千里未還家暮年  
詩酒醫愁藥浮世功名過眼花白屋謾栽高士



柳青門懶種故侯瓜日長社散歸來晚倚杖行  
吟送落霞林泉深處臥烟霞流水寒雲八九家  
江客帆檣懸網罟野人籬落帶桑麻案頭墨蹟  
兒臨帖燈下車聲婦絡紗待到春風二三月石  
壚敲火試新茶他警句甚多不能殫述再抽一  
二以示同好如殘曆愁中盡流年夢裏過客思  
秋聞雁鄉心夜聽潮林深芳樹合礪轉夜泉分  
流泉分古澗荒蘚上殘碑門掩花空落人間鳥  
不知石壁苔侵字松杉鳥護林山花韞綠鬢月  
鏡暈青天有田皆種秫無竹不當樓身病仍耽  
酒家貧易廢詩梅開人別久書寄雁來遲江沙  
粘野艇樓月照秋琴交情貧後見鄉夢客邊多  
天空孤鳥沒江濶遠帆來野色低青障亭陰壓  
翠苔世途輕白髮交態重黃金帶雨隨孤艇穿  
林翳晚鐘川雲沉野色溪雨亂泉聲書帶從爲  
草荷衣不受塵曉日黃泥坂春風綠草坡盡俗  
塵隨事減詩債少時無徑竹籠烟翠池荷戰雨  
喧野水帆歸浦秋山燒隔林小杓連雲汲方餅



帶月盛蟹旗翻曉帳雲連塞角奏寒譙月滿樓

送都使雨餘一水當溪落嵐淨千峰入戶低松門書院

催我年光惟曉屋擾人離思是秋砧雙杵搗殘

千里夢一尊傾盡百年心秋日偶成雉扇影分雙闕

下羊車聲度百花中啼鳥無情過別苑飛花有

意到深宮無題林隱曉嵐山半出湖添秋雨水平

鋪西湖茶竈曉烟籠野色硯池秋雨洗溪聲南白寺

酒熟時留客醉黃花開晚待詩催世事無憑蕉

覆鹿禪心已作絮沾泥送僧數點遙峰天地外一

聲長笛海山秋幽居一樽酒盡空明月千里書來

見故人寫懷南畝躬耕非管樂北窗高臥即羲皇

冬蒼草堂江上有詩楓落早籬東無酒菊開遲寄黃儼仁

南畝雨添畊後草西齋塵掩讀殘書看竹有詩

留野寺尋梅無路到溪橋輓林從韶庭梅破雪回殘

夢林鳥啼春怨落暉酒盃此別憑誰共吟社它

生得再回輓吳拙戒方伯皆惋轉切情新越可喜其為

名卿虛左引之入林不虛也近有吳韋卿者以

老抱關學杜詩續草幾千餘首而於潛尉林登



程休官後亦稱詩其咏餅菊云霜枝分折後猶  
貯半餅秋色自籬間出香從几上流差堪娛衆  
目寧許插盈頭一勺涵餘潤能存數日幽梅都  
尉園看竹云人去秦臺竹尚青四時疑有彩雲  
停霜中節凜孤臣操地下根分貴主靈三徑陰  
森連舊闕半溪烟雨暗荒亭孫枝爲染虹橋血  
化碧竿頭似有腥二詩爲余鑒賞卽未堪雁行  
竹溪亦見莆功曹中之不乏人耳

彭閣老

彭文憲閣老時咏陶潛云解印歸來雪鬢飄呼  
兒滴露寫前朝丁寧莫汲江頭水恐是金陵昨  
夜潮又咏昭君詩云抱得琵琶馬上彈朔風獵  
獵雪漫漫艸中白骨如山積莫怪將軍出塞難  
雋永有味堯山堂外紀作彭華詩查文思集無  
此詩則出文憲明矣

黃叅

石田題畫

沈啓南畫入神品而詩亦清真可咏予嘗得其  
題畫數首不必觀丹青水墨而詩亦可當生綃



粉本也。獸樹高樓日欲西。竹梢晴霧四簷低。流  
雲過去青山在。恰好捲簾幽鳥啼。山隱幽居雲  
木深。鳥啼花落晝沉沉。行人杖屨多迷路。不是  
書聲無處尋。愛是垂楊嫩綠齊。放舟晴日弄春  
溪。滄浪自唱無人和。飛過水禽能一啼。雨跡未  
乾花亂飄。一溪新水欲平橋。有人問我門前路  
不覺斜陽在樹腰。住處真成與世迷。一重雲水  
一重溪。會琴會茗還容客。客接木通橋。野水西碧  
水丹山。映杖藜。夕陽猶在小橋西。微吟不道驚  
溪鳥。飛入亂雲深處啼。臨水人家竹樹中。只因  
孤嶼水船通。當門細荇牽微浪。繞屋藤花落軟  
風水次。人家似瀼西。參差竹樹路俱迷。溪翁兀  
坐不出戶。日午飯香雞正啼。客來客去吾何較  
山靜山深事亦無。一卷黃庭看未了。紫藤花落  
鳥相呼。山雨欲來雲滿屋。溪風未起水生波。石  
苔坐久人垂釣。猶有微陽掛女蘿。山徑蕭蕭落  
木疎。小橋流水限林廬。秋風黃葉少人迹。雞犬  
不聞惟讀書。獸坐樹根無一事。清風滿袖作微



吟夕陽好在秋水外日閣遠山還未沉右詩皆  
石田集所不載皆于畫幅見之錄之以當臥遊  
耳

### 胡笳圖

沈啓南題胡笳十八拍云蘆葉傳聲拍拍鳴畫  
圖傳得態如生琰從三姓邕從卓自是人間父  
子情猛于斧鉞之誅者矣

### 唐伯虎

唐伯虎疎狂玩世稽阮之流也詩雖不甚雅馴  
而一段天然之趣自不可及如去日苦多休檢  
曆知音諒少莫修琴生涯畫筆兼詩筆踪跡花  
船與酒船秋榜才名標第一春風絃管醉千場  
苦拈險韻邀僧和煖簇薰籠與妓烘皆自寫胸  
次非若組織套語者也近雲間彙刻伯虎集中  
悞入宋張文潛七夕歌宜刪去之

### 唐寅題畫

偶見唐子畏山水一幅題詩云春風修禊憶江  
南酒榼茶爐共一擔尋向人家好花處不通名



姓卽停驂極有風致唐集不載

伍晏

清流伍晏弘治中貢爲廣文能詩如草根蛙鼓  
吹花底鳥笙歌閒堦秋掃葉荒徑晚挑蔬隔寺  
聞僧磬微燈認釣舟又漁滄廟云漁滄之下潭  
水流漁滄之上雲悠悠行雲流水自今古荒城  
故壘行人愁龍爲蛇今鼠爲虎腥毛臭骨皆塵  
土遊魂寂魄無所歸時傍寒蛩泣秋雨俱清雋  
可喜

寶鏡詩

楊用修寶鏡篇云繡戶無波菱自動紗窗不夜  
月恒光足稱工巧

王子淵祠詩

楊用修題王子淵祠一絕云曄曄靈芝發秀翹  
子淵摘藻揆天朝漢皇不賞賢臣頌只教官人  
咏洞簫詩意與田況琴臺相類

陸子絲

姑蘇陸文組夜歌云染葉作儂衾持水置儂枕



城烏夜夜啼寒苦不成寢美人寄書云秋夢無  
憑客路遙尺書封寄恨迢迢吳綾不及桃花紙  
顏色都從別後消皆有麗情

南屏詩

四明豐道生雪夜過西湖南屏山詩千岩萬壑  
玉層層夜半山腰見佛燈竹影掃窗塵不到浦  
床風雪定中僧清逸逼人

陳高吾桃源詩

武陵陳高吾少司馬題桃源云輪蹄影絡東西  
路雞犬聲聞遠近村又云有無仙跡在何處今  
古人家住此山亦佳句也

陳德音

吾鄉嘉靖中有陳籥字德音隱士也詩法唐人  
人無知者近其孫鴻出遺稿一帙佳句層出如  
山深僧餉早天遠鶴歸慵日影沉秋磬松聲響  
暮山歸心秋轉切遠夢老難成窓寒葉落後竹  
響雨來時久客依人懶虛名到老休行裝衝片  
雨歸夢落千山棲鴉驚夜火歸雁過更樓殊有



幽人之致

周所諧

周所諧名如埴莆處士也足跡不出戶庭苦吟  
弗輟未嘗妄與顯者遊里中鄉紳學士罕識其  
面故其爲詩綽有林壑之致自作田家吟云不  
識市朝車馬喧殘蓑弱笠老田園柴門去郭無  
多路野竹臨流自一村春雨桑麻終歲足清時  
雞犬數家存兒孫牧畜南山下爲道須防猛虎  
繁可以見其逸韻矣他如風生極浦潮常白霜  
冷空林艸變衰萬里寒山橫積雪半汀衰草隱  
斜陽百花潭上漁竿在五柳門前鶴徑荒因嫌  
城市非吾土却傍漁家作比隣墻壓花枝妨客  
過泥深苔徑喚人扶等句全無烟火食氣

西湖聞笛

嘉靖中餘杭詩人徐後西湖聞笛云月白霜寒  
客夢醒笛聲迥出柳洲亭莫教吹過孤山去風  
裏梅花不耐聽一時傳之

楊椒山臨刑詩



楊椒山臨刑賦詩云浩氣還太虛丹心照千古  
平生未報恩留作忠魂補千載之下猶有生氣

鄭養晦

黃增

鄭昭封公字養晦閩之惠安人系出莆朱氏襲  
母姓以子苑馬卿一龍封主事贈中憲大夫所  
著小園抱甕錄有蠹木賦何穉孝司空刻之文  
徵矣余錄其桃源行云當年父老苦秦苛扶携  
去種武陵桃種桃父老死已久只有兒孫食土  
毛後來漁者因迷路忽入桃源驚指顧慙慙相  
訊果云何彼此諄諄各言故我爲先世避秦來  
種桃自活山之隈世世但知桃有實年年不問  
今何時花開葉落長如此地析天分豈所知漁  
人爲道秦不久鹿因爲馬死劉手炎精尋蝕復  
重光四百餘年有九有三龍鼎峙難以居五馬  
渡江晉室餘紛紛胡羯彌寰宇我欲避秦曷去  
諸一聞此語共愀然自是人間別有天旣脫秦  
人狼虎口又免漢魏幾倒懸爾今遠來可共處  
倘若辭歸勿浪語此中奇隱六百年未許外人



來遊此漁郎謂我有妻兒不得久留遂去之一  
行一顧一表誌去後重來失路歧世人便作神  
仙道神仙蹤跡豈人到古多避世深谷中豈獨  
商山有四皓吁嗟世變日異常在處無非爭奪  
場不是深居何有鄉胡能不見網羅傷手植園  
竹云嗟我先人舊卜居四圍未有一枝竹鷓鴣  
巢林鷓飲河環堵蓬蒿豈問俗邇來學古手移  
栽甫及二年笋抽玉咫尺琅玕迸地穿須臾不  
覺似有六居然孫子傍母生孫子自高母自却  
一年勝似一年高四時無改幽軒綠孤風凜凜  
迫古人夷齊不食周家粟西晉七賢願卜隣李  
唐六逸思改築嗟予無事時翫之日食何須更  
有肉此身雖瘦道自清敢望對之仍大嚼森森  
君子立園東安得異時鸞鳳宿古人以竹比兒  
孫我今作歌歌淇澳二詩清真簡遠超然塵垢  
之外課子及孫有處世寧須辭爵祿立身全賴  
有詩書之句今孫又煥以名進士官瑣闥能世  
其家云



鵝池生

趙郡宋登春自號鵝池生壯歲鬚眉皓白任俠  
遊燕趙間後薙髮爲僧不知所之吳郡徐大宗  
伯學謨爲之傳而梓其詩詩悲惋豪逸嘗賦俠  
客行云賭擲賽劉琨家奴過孟賁千金不肯顧  
一劍爲酬恩趙瑟停鳳柱燕姬促象尊平生款  
段馬羞入孟嘗門又抱玉幾年終獻楚懷書垂  
老莫干秦又酒腸方大黃金盡世事才知白髮  
多皆自寫其胸臆者也

謝司農詩

吾鄉謝大司農杰宿雲窩有詩云刀圭有分仙  
緣熟雞犬無聲午夢閒佳句也

楊鵬翼鞦韆詩

咏鞦韆詩以洪覺範之作爲最而元人楊鵬翼  
一首尤佳也日轉華簷樹影偏謝家庭院簇神  
仙綵繩斜擘纖纖筍畫板輕承步步蓮弄玉未  
升雲漢上綠珠先墜舞樓前不知小徑殘紅裏  
明日何人拾翠鈿近徐茂吳有句云蓮生不在



地柳弱會搖空亦自有致

沈明臣苧蘿山詩

沈明臣題苧蘿山云越國輿圖海上多千岩萬壑繞鯨波計然空奏亾吳策誰道功成在苧蘿亦微婉

纏頭集

京口鄔佐卿字汝翼中丞公子也性豪爽喜遊俠邪著述甚富自文集外有艷詞十卷題曰纏頭集皆生平贈妓之作佳句麗情可歌可咏如笛中舊恨留金谷天上新愁問玉卮江柳眉稍雙鎖恨海棠春盡獨銷魂寶鏡夜寒鸞顧影畫梁春暖燕歸樓妝粉曉沾蝴蝶草啼紅春染杜鵑枝髻梳蟬影分雙翼衣剪靈綃學六銖小閣題情緘荳蔻空庭微步出蓮花樓前彩鳳隨仙史陌上銀箏悞使君春回漢水思捐佩月滿秦宮照捲衣玉樹輕霜凝屈戌垂楊新月掛鞦韆楊柳調翻歌扇月柘枝香度舞裙風翡翠香籠條脫煖梧桐聲轉轆轤寒明月小樓關盼盼垂



楊深院李師師等聯膾炙尤甚義山無題之後亦不多見也

黃孔昭 黃增

崇武黃孔昭山人名克晦以詩鳴海內舊矣余曾識之燕市中歿後家遭鬱攸籍盡燬黃太傅彭湖撫齊時爲刻之山東今版不知尚存否余恐其久而湮也時摘其七言律云寒色蒼蒼落日斜空庭獨立數歸鴉石人此際方無淚羽客今宵亦有家已判離愁消栢葉誰堪詩句頌椒

花明朝攬鏡休憐色未入新年鬢已華 玄宮 除夕 江

城入夜竹煙青急雪飄風玉滿庭亂絮乍欺千樹火同雲全沒半橋星鼓邊鷺羽飛還下歌裏梅花落不停四座同心如朗月瑤臺春酒可教

醒 上元雪 夜觀燈 水部官梅已不存折花何處坐黃昏

故人魚信空烟水歸客春衫漬淚痕樹色雲迷滄海徼濤聲月湧楚江門遙憐匹馬長安道偏

有諸生望叔孫 廣陵懷 孫博士 東粵重來倍黯然荒村

古堡暗蒼烟山中故老無歸業水上新民未種



田江燕春深巢樹腹野狐日落吠谿邊東風那  
管亂離事草色藤花似往年惠陽傷亂十載珠江又

一樽涼風萬里灑江門客談遺事猶能記僧恨

留題已不存暝色未沉天外樹月光欲動水邊

村孤亭坐以人聲絕明滅漁燈兩岸昏海珠寺四

百二峰半是雲舟中終日對氤氲天陰不辨神

仙氣雨過還開錦繡文石洞別時花自落鍊橋

行處水空聞夜來葛令親相語丹竈重泥却待

君舟中望羅浮桃花洞口醉如泥鍊笛橫吹乍出溪

帶月欲歸滄海上隨風忽過畫樓西林空巢鶴

翛翛起簷迥飛雲片片低半夜何人聞此曲萬

家俱向夢中迷飛雲閣聞笛千重流水百重花懸磴

依然曲曲斜亭下小松青蓋偃峰頭大字綠苔

遮絕憐雲竇教亾酒生愛泉聲鬪煮茶借問主

人今強出還應誰爲伴烟霞巢雲巖次派上人蒹葭霜

落夜迢迢江水無風也自搖正憶高樓坐逋客

時聞險語出層霄隔橋人語三家市近浦雞聲

半夜潮新酒滿樽懷我否可無白鶴一相招寒夜



憶張星湖

風豁雲門險若何芙蓉步步拂雲多滿襟

落蕊披花入兩頰蒼苔轉石過水黑空潭龍蛻

朽天清萬樹鳥聲和山靈未必欣相逐凝笑逢

人帶女蘿

溪源道中

豁舟無力谷神光石像千年草

樹傍匪虎不曾悲曠野猶龍何事蛻高岡雨深

衣袂生秋蘚月曉鬚眉帶古霜誰謂西戎終不

返山中紫氣夜何長

靈坐石老君

京門分袂各沾衣

六載懽生入夜歸征馬何言難復繫離筵只勸

莫停揮湖南草爲王孫綠北渚雲隨帝子飛千

古小山稱小雅賦成應寄釣魚磯

送顏範卿對岷府左相對

酒常逃醉後禪當歌猶是飲中仙狂來險語爭

千古老去降心畏少年燭外天河低入樹簷間

露竹暗浮烟相看已盡清宵樂惟問車公何處

邊

集李世禎蘭芳亭

靈峰入暝更嶙峋寺外輕帆泊古

津五岳乍歸天外客雙林還坐月中人泉聲隨

梵飄松壑露氣凝雲覆水蘋明發山巔更滄海

風高從拂白綸巾

鼓山寺

薊門衰鬢颯驚秋風雨

蕭蕭獨倚樓四海新知名下老頻年多病客中



愁雲連北極迷宮樹水發西湖出御溝京國逢

君懽不淺可憐經月不同遊病中寄歐禎伯破曉天雞

隔翠微五松絕壁倚巍巍雷霆闖峽雙龍走日

月爭池一鳥飛碣上苔花留篆影封中雲氣變

秋衣二臺顏色依然好為我西山駐落暉和詹中丞

泰山纔過危橋便隔人稠花接葉復迷津朝朝

山翠皆成雨樹樹禽聲各為春每以烹茶知水

品不緣垂釣饌江鱗永和千古風流在百罰深

杯也莫嗔暮春集曲水亭漢家列郡古名州五馬連翩

擁七旂去路雲蒸三伏暑到城月滿一天秋窓

中遠岫廬山出門外平潮楚水流若問襄陽曾

出牧至今耆舊滿歌謳送黃饒州舊為襄陽守纖月西樓

已可望鴈聲斷處一痕霜微紛露葉光猶淡初

上風簾氣自涼羌笛漫教悲舊曲娥眉空與妒

新粧只將今夕娟娟影預卜中秋一夜長八月初三

夜南園斗酒為誰餞韶華暗別傷人粲一風一

雨花奈何春去春來人自換蛺蝶偏隨坐處飛

殘鶯欲向愁時喚年少那能不送歸到是白頭



心易亂

送春

五言排律元戎不復古  
伐駟亦無良

歲歲勞占募區區守大荒  
輕車今滿地比馬各  
成行大將高壇上中軍細柳  
傍留侯方虎嘯尚  
父欲鷹揚心苦頭顱白  
年高膂力剛指揮雲鳥  
集訓練藻鳧忘令節春  
鑽木嘉辰宿在房  
百金名下選三屬戰時裝  
芳草承輪碧飛塵繞陣黃  
吹笳凝未徹職志遠相望  
雷鼓聲難及風燄勢  
莫當止齊刀劃斷立壁  
缺迴將盾盡雙龍合弓  
皆兩石強逆鱗櫻自碎  
怒臂到應傷揖客元非

蕙豎儒固乃狂觀兵雙毗裂入幕二毛蒼氣借

銜杯湧言因說劍長行看清瀚海坐見擄名王

欲載班生筆還歌吉甫章

神機營觀俞都護車戰

江水合

秋淨潮橫帶岸斜乍沉青艸堰俄失白鷗沙  
夜

色開天鏡晨光盪日華一龍吟自冷乘鴈集何

加碧映臨流郭清涵理釣槎世人多自喜河伯

未應誇

水浦澄江

七言排律四門已下先生榻雙樹

因過大士家牀上詩書連釋部  
桁間袍帶雜袈裟  
疎簾映日垂垂白絳帳  
褰風故故斜古調已



知傾海內同聲猶自滿天涯水河赤鯉堆霜膾  
火圃黃蔬煮綠芽社友舊曾期慧遠門生今復  
識侯芭酒中爲壽身先起醉後留懽興轉賒落  
日龍鍾扶上馬寒空蕭瑟數歸鴉陰沉九陌雲  
如葉颯沓千林雪欲花爲問何時還更約吟鞭  
早拂五城霞歐博士招  
飲繡佛齋五言絕遠影亂歸帆孤  
烟發長磬垂綸岸岸移楊柳遞相映題  
畫簷口日  
落昏牛羊下長阪笛聲乍有無漁舟知近遠郭  
甫

草

七言絕五虎山如五虎蹲盡對無諸舊國門

無諸去後山空在秋草蕭蕭日又昏 微茫星

月下江鄉三十六灣江水長夜半舟人相借問

好風日出到洪塘 靈山廟枕越江臯中使三

年一換袍神去神來人不見滿江風雨浪頭高

渡頭相送泪沾衣日暮相思不下幃潮水莫

言還有信渡船兩日一回歸 南堤楊柳北堤

榆新樹成陰舊樹枯所恨相逢俱窈窕悔將薄

倖怨狂夫 苦竹渡邊苦竹枝常思嶺下常思

誰奴自不言誰得會江風江雨自應知 雲起



南臺墨未濃俄然一雨暗千峰  
篙師解說當年事臺下分明有白龍  
越王城裏九山分只見

三山翠入雲山下有山看不得  
奴從何處可逢君

款乃馬上寒風拂紫髯  
胡沙映月白纖纖漢

家金印元如斗勲業惟看盡  
戟尖送人懷君山

上白雲巢一雨鳴泉百道交  
巖下新松今許長

滿庭風影月中梢 懷君水榭枕江流  
楊柳夫

容夾岸秋明月滿天漁唱罷  
吟詩誰共白鷗洲

懷君水上木蘭船白日空維柳  
樹烟一片風

來何處落銀河舊泊斗牛邊  
懷君白鶴太孤

高夜半寒聲落海濤遊子貂裘  
今敝盡霜前為

緝刷風毛四懷寄石罅秋花結紫藤  
陰苔如錦

覆峻嶒北宗弟子今誰在猶說  
當年有懶僧懶

洞虛竇明通一指窺風吹塔影  
落霜幃只緣插

漢千餘丈莫訝高標却倒垂  
塔影亂山無徑不通

樵漁含陰陰映綠蕉樹杪泥乾  
江水落村邊沙

白瘴烟消康州詩皆清峭絕塵  
憂玉敲金其它

秀句不可殫述如魚龍夜市  
翻滄海星斗春城



落暮雲寒氣猶凌風裏樹晴光初閃日邊山得  
酒有時還罵坐遊山無處不依僧老知白壁投  
人暗貧笑黃金結客稀當樽不乞天孫巧取石  
曾逢日者看白髮不堪搖落夜青燈况對別離  
樽山市慣嘗元亮酒江門堪憶季鷹魚客中良  
晤秋三五水底青天月一雙江亭中秋月明應作梅  
花夢吏散還書竹葉符送人令寒聲萬井傳雙  
杵隻影空庭過斷鴻江湖結客名終在風雨還  
家夢未真水帶平蕪雙鳥下雲連遠寺一僧歸  
晚眺雲氣未分樵客路鐘聲乍動羽人宮嵩山海上  
秋霜知歲隔花間春雨待泥乾送燕語語新俊可  
喜與劉長卿謝臯羽差堪伯仲矣惜前半偶佚  
當覓而補之

沈佺侗

吳人沈愚號佺侗善書工詩雪夜云瓦爐温酒  
夜燈前紙帳梅花伴催眠不似玉堂金馬客五  
更風雪去朝天

辨琴聲



唐李龜年至歧王宅聞琴聲曰此秦聲良久又  
曰此楚聲主人入問之則前彈者隴西沈妍後  
彈者揚州薛滿也王百谷曲中有詩云一半秦  
聲半楚聲秦娥調瑟楚娥箏鳳皇城裏家家雪  
但是紅樓凍不成用事恰當

梅子馬寄情詩

宣城梅蕃祚喜遊平康當意則揮千金不惜有  
寄馬湘君云流澌十月下雙魚傳得金陵一紙  
書馬角未寒盟語後蠅頭猶漬淚痕餘夢中暮  
雨題難就鏡裏春山畫不如紅杏碧桃千萬樹  
待儂花下七香車麗情綺句溢于筆端然竟以  
色死于金陵

御溝水

唐人咏御溝水詩頗多亦有佳者第不如近日  
章元禮一絕爲勝詩云西山千澗水爭流盡入  
宮墻出御溝紅映芙蓉青映柳更調鉛粉上朱  
樓

魚鱗雲



淮南子曰雲如魚鱗湯義仍詩風光散羊角雲  
氣集魚鱗亦工巧

### 江仲魚

崇安江仲魚諸生也予從王粹夫識仲魚乙未  
予之武夷仲魚導予遊三十六峰仲魚雖經生  
有碩人之致武夷諸峰各置書帙筆硯隨意所  
適留連旬月衣道衣冠道冠又儼然羽流也仲  
魚善詩詩不作人間語嘗賦秋風懷友吟二十  
餘首皆道侶漁父樵夫與猿雀而已風塵之客  
不預焉如懷朱漁父云九溪深處似嚴灘渺渺  
風塵白眼看葉艇每隨幽嶂出茅房孤掩落花  
殘芙蓉衣上雲千片楊柳磯頭月一竿釣罷尾  
瓶曾共醉滿身零露不知寒未幾仲魚逝矣年  
僅三十也每過武夷不勝山陽之愴

### 何樵仲

何樵仲名其漁邵之建寧人也爲詩有苦思樵  
仲死予哭之詩偶檢其手稿絕句有冷然之韻  
梅口待渡云野曠微風起白蘋村居三里若比



隣江干風冷秋山暮立盡斜陽無渡人碧簫洞  
云長林籟靜自盤桓松露侵衣夜未殘三十六  
峰明月曉碧雲吹破洞簫寒山下買酒云隔浦  
漁家傍酒家漁罾掩映酒帘斜探囊恰好供歸  
興買得黃魚并杏花

張陽生

張陽生者名復亨郡諸生也能詩而名不顯丙  
午歲始與予定交一再執臂而陽生遂以疫死  
年未三十也遺稿散逸予從友人處拾其北征

一集有遊西湖云山翠湖光晝染屏珠宮縹緲  
晚鐘微僧尋三竺沿堤過宦認孤山背水歸橋  
影亂分公子棹荷花輕着美人衣繁華不醉飄  
零客愁聽啼鵲又夕暉又上寧夏黃開府云登  
壇十載拜西征部落爭傳建節名虎竹嚴分秦  
斥堠狼烟初斷漢長城葡萄月上降羌舞苜蓿  
風寒戰馬鳴幕府能容前箸借少年原是棄繻  
生又魚窺法座澄波淨龍起空山宿雨腥寄食  
應尋彈鋏侶埋名終託鼓刀屠春陰香徑宮蕪



沒烟斷松橋岸柳疎五言如花開招客至松老  
著書成晚晴催積雪殘雨入輕寒雨聲分夜話  
听火對秋眠皆警句也

林時中

友人林宗大字時中邑諸生也屏居村落不入  
城市好吟咏人無知焉獨與余兄弟交最驩歿  
後遺稿散落偶得數首亦自有致送人尉西蜀  
云百仞高峰入縣門官閒何處不君恩莫將萬  
里思家淚落盡巴江一夜猿又范增墓云鴻門  
玉玦計難行楚漢雌雄勢已成何待彭城方發  
憤可知亞父亦虛名孤墳不滅英雄淚落日堪  
傷鶴雀聲此去赤松應咫尺白雲千載壯留城

鴻門宴

謝臯羽鴻門宴一篇可泣鬼神楊用修極稱之  
又有楊廉夫韓仲村繼作稍不及也予友林子  
真復擬一首云翳雲埋空日色黃一龍一蛇閒  
相將指天有約公莫舞後入者臣先者王此日  
鴻門判生死戰場咫尺華筵裏漢王若失我爲



禽寶玦無光玉劍起覆卮壯士怒酒醺苾碭山  
北愁歸雲一雙玉斗正飛屑漢王間道馳至軍  
奇峭可喜不減廉夫仲村也

吳非熊

新安吳兆非熊能詩而貧日甚游江湖十年落  
魄不能爲歸計有詩云谷口鍾聲度嶺微嶺頭  
嵐氣散朝暉江山處處通鄉路只是遊人不得  
歸可謂深于貧者矣又如松楸有夢鄉山遠桑  
柘無烟野市寒歸夢馬寒廬岳雪驛樓人夢秣  
陵鐘尊前坐臥憐多病海内存亾問故人原桑  
漸綠春蠶起岸草初齊候鳥鳴皆雋爽有味予  
友曹能始交遊遍海內而獨賞心非熊卒之客  
死粵西悲夫

貧況

陸放翁詩云糴米歸來午未炊家人竊憫老翁  
饑不知弄筆東窓下正和淵明乞食詩近友人  
新安吳兆詩云釜裏生魚甕裏塵非關久病却  
關貧案頭但有梁鴻傳閒誘荆妻學古人皆深



于貧况者此况難與富見道耳

采蓮曲

吳門沈從先采蓮曲解道芙蓉勝妾容故來江  
上采芙蓉檀郎何事偏無賴不看芙蓉却看儂  
風致可挹

顧仲韓

黃增

華亭莫廷韓上洋顧仲韓皆奕奕才情昉倩辯  
麗稱雲間二韓廷韓文名滿天下有石秀齋集  
行世仲韓詩勵有存人莫能名者其諱斗英籍

上海諸生符丞名世公子也少有雋才磊落不  
羈窮服饌娛聲色選伎徵歌座客常滿日費萬  
錢不恡每出輒載與俱盡舫旅栖盆卉圖書古  
尊罍畢具竟以此傾父貲鬱鬱貧病以死余薄  
游海上始知有顧仲韓而墓草宿矣詩多憐風  
月狎池苑大都流靡以自妍今錄其尤者五律  
如十五畫新蛾紗窓乍學歌纖腰微約素美睽  
暗迴波遇賞春愁少逢歡夜態多名花非不艷  
解語奈卿何

花間有贈曉夢回金屋簾櫳月色寒難



將鸞鏡擬猶作翠眉看滿過還疑滿殘來似未  
殘清光元不異祇惜夜將闌

殘月如新月

雲巖環四

壁愁病挾書眠夕枕頻妨雨晨炊屢罷烟寡交  
憎醴合多技悔膏煎欲識山中傲來聽叔夜絃

答汪育虹問疾

吾意自從好世情空棄貧食魚慙幸舍

捫蝨向時人餅粟傭書滿山花抱甕新壯心悲  
櫪驥多病亦精神較稭還復嬾擬庾更多愁拙  
笑安蛇足癡真類虎頭捫胸開五嶽搖筆吐干  
秋不解干人策文園豈倦遊幽栖成獨往孤憤

好誰論市駿臺空築雕龍筆未貧簡囊羞子母  
扶病賴君臣不信揮金者終爲泣玉人古人非  
困極詎以不窺園志得貧翻樂生從病益尊滑  
稽聊玩世聚散漫題門大雅存吾道頽風不可  
論

卧病感懷

七律如春染隋堤萬縷搖隔年憔悴一

時消剪來翠羽初成葉銖得黃金乍作條不雨  
不風猶自恹新鶯新燕共爭嬌行人未許輕攀

折留與娥眉照樣描

新柳

西風蕭瑟柳條輕翻似

依依乍向城看去尚含南浦恨折來俱是故園



情楓林解點桃花色杜宇能爲黃鳥聲留得舊

時餘影在秋江一路月扶行殘柳如一自瑤臺

換羽衣怕來塵世惹芳菲人間不合釵頭見花

底誰知月下歸掠向夜窓驚曉色穿將珠箔亂

朝暉婆婆冷艷無消息想爾深深避葉飛梨花白燕

衰草荒原野燒生寒消殘燭旅魂驚異鄉兄弟

千行淚一枕風濤半夜情欲託緘題無去鳥誰

憐踪跡尚浮萍孤蓬已是腸堪斷况是蛩聲又

雨聲夜泊思家金閨罷繡坐簾櫳忽下霜前片葉紅

無限閒情憑素管好隨流水出深宮空嚴魚鑰

門重鎖誰曉鴻書路可通祇恨殷勤題不盡何

時芳樹又西風御溝紅葉貧如楊子文難送渴似相

如賦未成自厭炎霜淹病骨不妨涼燠換人情

禦寒裘敝翻誇縕嗜酒囊空每羨醒吾性寡營

今有慕何當騎宦聽濤聲七絕如一片春山乍

學描纏頭初試紫霞綃章臺無數青青柳最惹

東風是嫩條秦淮小姬病臥那知春去來祇看花謝

與花開傷心不獨憐春盡虛擲韶光轉自哀送春



其它警句如樹鬪先客醉山欲借烟奇苔青山  
作黛沙白水爲衣窓暗刑花雨池酣織柳烟山  
從斷處教雲補橋向歆來仗石扶長林興到頻  
呼月野渡人催已上潮江迴斷岸隨蓬轉風逐  
流雲帶葉飛欲延月意窓從破恐碍荷香麝罷  
焚春老惜花悲甚鳥雨淫憂歲望深農白髮憐  
人看未滿青趺問我剩還無皆淒清有致讀之  
歆歆欲絕傷其才而不遇也

林春秀

古田隱士林春秀字子實號雲波性嗜酒馳詩  
家貧不能取酒有友鄭鐸多良醞日往飲焉醉  
後則酒狂不可禁鄭度其量錫造一壺刻雲波  
二字至卽盛酒飲之三十年如一日也林詩奇  
警不凡山居云但住溝西第五村香秔釀熟少  
開門家僮祇自爲樵牧徑竹憑他長子孫雨過  
曉山泉噪澗花生春菜蝶穿園抱琴客到棠梨  
下卯酒猶醺藉柳根又云迴巷短垣緣枸杞古  
塘枯竹立鷓鴣壁間寫遍籬花影雲裏崩來水



碓聲又云野老眼經門刻字漁郎親見水沈碑  
鄭歸泉下數年林亦髮種種矣每讀其詩輒詫  
與人兩絕也

白燕詩

白燕詩國朝袁凱最得名而後人和者最多近  
見江西鄧泰素二律亦新麗可喜從前故壘是  
耶非別後新姿似者稀春曉玉樓乘霧去夜闌  
銀漢帶星歸凌波不着鴉頭襪剪水如牽雀  
衣多少伯勞堪遠避輕描淡抹向西飛同去同  
來伴侶非異姿異態世全稀鉛華盡洗都無着  
銀蒜低垂若箇歸遠向吳門裁匹練早從王謝  
托烏衣惟餘嘴距新紅溜猶啄梨花蹴絮飛

墨紗燈

閩中近製墨紗燈精巧異常海內爭重之曹能  
始曾於杭州逢元夕人家有張此燈者乃邀友  
人同咏能始詩云質裂橫疑水光生薄似苔憑  
將彩筆畫認作剪刀裁烏向空中度花從鏡裏  
開細看若無力不畏曉風催諸子罷唱



米君夢秋柳詩

黃增

近賦秋柳詩者數十家無如米君夢之婉轉怵  
悵附物切情原草十二錄其九離亭當日唱離  
歌祇爲柔條傍渭河恨不任他攀折盡衰來徒  
自惋傷多百年秋思愁中斷千古春情夢裏過  
縱是王孫金勒馬也應相向歎蹉跎 一夜西  
風耐便凋他鄉何處不蕭蕭依稀剩有葉還無葉  
搖落長條復短條難忘折來情脈脈更愁看去  
路迢迢經過若問傷心地涼雨寒煙鎖灞橋

纔失陽和氣便寒遙林遮霧曉漫漫微霜未着  
枝先勁零露方滋葉已乾弱質縱凋還自惜芳  
心猶在詎應殘請君試看深秋色不學青楓更  
染丹 濯濯芳時枉自矜枝頭錯許露珠凝綠  
陰別去留難住黃葉飄來掃不勝新曲更翻成  
苦調舊遊重過等寒水天涯一望同岑寂未必  
豪華在五陵 名擅章臺第一家忍將憔悴送年  
華容銷已失如看葉才盡難迴比雪花纔見高  
樓堪繫馬俄同寒樹與栖鴉榮枯只是尋常事



忽漫逢時莫自夸 何處相逢最有情  
平康曲轉大堤橫 迴眸不忍枝頭望  
攜手真愁樹底行 近淚幾絲渾欲斷  
牽情千縷苦相縈 自經委謝無窮憶  
應悔風花忒煞輕 寶馬香車滿路塵  
相看能得幾時新 飄將墮地皆成土  
悲自傷心敢怨人 綠謝枉遮千里目  
青歸難借一絲春 蕭條隨分黃泥岸  
羞把繁華問水濱 不和悲歌也自傷  
秋來天地慘茫茫 愁生衰草斜陽外  
恁結歌臺舞榭傍 歲歲煖風吹到冷  
枝枝綠葉變成黃 而今始信桓司馬  
當墮金城淚兩行 不作風聲作雨聲  
牢騷無復繫人情 悲來屈宋應成賦  
凋後檉楊莫辨名 寒露降時渾是殺  
孤根隨處合 全生秋條好耐三冬過  
依舊萌芽各自榮 君夢名雲卿生于汴  
徙于婺卒于茗 有山居詩極幽人之致  
在南中贈余二律 殊獲我心今佚不存矣

問月樓集

崔孝廉徵仲貽予新梓問月樓詩中多雋語贈



州同王九皋云笑我無魚歌幸舍憐君有蟹領  
監州送劉之采將軍云射虎功高偏不賞雕龍  
才老竟如斯贈陶養嗣云鳥留書法皆成篆龍  
是文心不用雕贈王蓋卿再舉子云搗盡玄霜  
元得偶捧來明月本成雙吊謝皋羽云魂隨宋  
寢冬青樹墓傍嚴陵古釣磯煅鍊工巧詞壇之  
射鵬手也

長溪小草

潮陽吳光卿仕訓以孝廉董長溪教事工於詩  
有卓錫寺云老僧舊說留衣地幼婦新題卓錫  
碑又贈龔令君云問俗已看馴魯雉隨車復見  
舞商羊出都門云能無背水師韓信豈有窮途  
效阮公詠懷云少年懶性拋書早暮景微官照  
鏡頻潮陽前有周廷尉善鳴今則屈指光卿

筆精卷之四終



